

M315: Landgraf Ludwigs Kreuzfahrt

0,1 DEn die reiner herzen gvt
0,2 wesen suze wol gemvt
0,3 Den ist mit suzer rede wol
0,4 mir ist geboten daz ich sol
0,5 Ein rede tzu rechte birichten
0,6 in warem rim v'slichten
0,7 Ordenlich zu bringen sie
0,8 als der edele furste die
0,9 Nicht rechte geordent fvnden hat
0,10 dem liebet hohes prises tat
0,11 Vn- die vron eren holde
0,12 mer v'nvnftic haben wolde
0,13 Vf frevden aventuere
0,14 in sinem hvse zv stvere
0,15 Vn- wil zv lust genizen ir
0,16 dar zu genade gebe mir
0,17 Der kvnic der allen kvnigen obet
0,18 als er des immer si gilobet
0,19 // Vn- si bihagelich ovch da bi
0,20 dem wolgemvten werden si
0,21 Der mir diz werc bevolhen hat
0,22 als mich sin wurde des nicht erlat
0,23 Ich wese im ein dienst hie
0,24 dem ich doch wolde dienen ie
0,25 In dinem namen criste ihesv
0,26 d' rede wil ich biginnen nv
0,27 Do der edele eren riche
0,28 vor gote der lobeliche
0,29 Hertzoge von lvthringen
0,30 volkvmen an allen gvten dingen
0,31 Gotfrit . zu kvnige nv was irwelt
0,32 menlich gemvter als ein helt
0,33 In ir helfe der cristenheit
0,34 vor aschalon den sig erstreit
0,35 An dem soldane von babilo
0,36 clemens der hiz dar nach . do
0,37 Gotfrid den heyden fride sprach
0,38 als sie des baten . vn- dar nach

0,39 Itwetersit man stete
0,40 den gelobten fride hete
0,41 In iherusalem do rueten si
0,42 Robert der grave von normandi
0,43 Mit im Ropert von flandern
0,44 mit vil herren den andern
0,45 Ob ich s wolde die ich wol nande
0,46 iz wurde zu lanc . heim zv lande
0,47 Vrlovp zv m kvnige namen die
0,48 der sie nicht gerne von im lie
0,49 Er mvste sie lan si crigten hin
0,50 noch hilden aschalon die sarrazin
0,51 Als ir lehste strit da vor geschach
0,52 in dem andern iar dar nach
0,53 Gotfrit der prises vil irwarp
0,54 eines gimeinen todes der kvnig starp
0,55 Den gimeine mit al der phafheit
0,56 biweinte grozlich die cristenheit
0,57 zu golphatha als er des bat
0,58 an vnsers herren martherstat
0,59 Leite in der patriarche
0,60 in einem tueren sarkhe
0,61 Wart er kvniclich v'wieret in
0,62 nach im sin brvder baldewin
0,63 Mit aller der fursten ger
0,64 in edissa wart kvnic gecronet der
0,65 Als er nach hohem prise ranc
0,66 vil der lande er bitwaenc
0,67 Ein menlicher helt ouch erntshaft
0,68 im was des liebes volle craft
0,69 Den vianden sharf in strite hart
0,70 als er kvnic gecronet wart
0,71 Amalech von arabia .
0,72 nam von im sin riche da
0,73 Nach dem philisteus
0,74 aschalon vn- tyrvs
0,75 Wolden im zv dienste leben
0,76 vn- wurden sine zinsgeben
0,77 Der keiser vz chrichenlande
0,78 vil richeit er im sande
0,79 Sin warer helfer iach sich d' sin
0,80 zv einem svne im welte er in
0,81 Davit von armenia
0,82 vn- der kvnig von avenia
0,83 Seltsene kleynot . vn- gabe rich
0,84 si santen im vn- gaben sich
0,85 Ire fursten die chorrozani
0,86 die persen vn- die medi

0,87 Im santen durch sine werdicheit
0,88 sie lobten sin im bireit
0,89 Prothi die en wolden in
0,90 v'names nicht einen menshen sin
0,91 Svnd' er were mars der got .
0,92 an den sie warten in strites not
0,93 Er were ouch ir got der cristenheit
0,94 mer v'meret was sin werdicheit
0,95 Vber den nylvm vn- vber daz rote mer
0,96 do er mit sinem werden her
0,97 Reit von edissa . der stat
0,98 da man in gecronet hat
0,99 Vn- zu jherusalem er wolde
0,100 als man in bistetigen solde
0,101 Zwissen neapolis vn- anthioch
0,102 die heyden im viende waren noch
0,103 Si hetten craft vn- vil was ir
0,104 wol mvgen nv daz sprechen wir
0,105 Daz der irwelte baldewin
0,106 ein menlich helt ist gesin
0,107 Veste gemvt ein furste
0,108 in vollem getvrste
0,109 Durch der viande lant er reit
0,110 die durchvart was im doch v'seit
0,111 Vor . von den sarrazinen
0,112 Baldewin do het der sinen
0,113 Im vf den wec vz gesvndert
0,114 nvr virzic vn- hvndert
0,115 Ritters manlich vn- vestegemvt
0,116 geriten starc vf orsen gvt
0,117 Ouch also manigen genden man
0,118 vor eime gebirge was ein plan
0,119 Vf deme die heyden mit craft
0,120 lagen mit voller ritterschaft
0,121 Als da des kniges warten si .
0,122 daz gebirge genant ist perithi
0,123 Durch die enge mvste baldewin
0,124 do er nv was so nahen in
0,125 Kvmen daz er wol marcte die
0,126 viande . vn- ouch in sahen sie
0,127 Hvndert tvsent waren der
0,128 in gotes namen mit in streit er
0,129 Hi zu gehorte rede vil
0,130 die ich durch kvrze lazen wil
0,131 Wen got half baldewinen
0,132 daz er vn- di sinen
0,133 Mit so cleiner ritterschaft
0,134 an gesigten so starc der heydenschaft

0,135 Fluchtic wurden vor im die
0,136 er iagte in nach irslagen . sie
0,137 Wurden von im daz merer teil
0,138 die andern tiefer wunden meil
0,139 Als die cristen sie nicht sparten .
0,140 furten war sie karten
0,141 Mit dirre cleinen ritterschaft
0,142 hin tzv syon twanc er zinshaft
0,143 Die lant gar biz an bersabe .
0,144 er irwarp da prises me
0,145 Marthimam die gyten stat
0,146 stritlich er gewonnen hat
0,147 Von d' an daz wazzer albana
0,148 die heiden er im neigete da
0,149 Der vil daz leben doch v'los
0,150 von albana vber zv orchados
0,151 Von dan biz zv Rvbim
0,152 zwissen joppen vn- philistim
0,153 Tyre des ledic vor im bleip
0,154 doch die heidenschaft er da v'treip
0,155 Waz der nicht tot wart geslagen .
0,156 noch sich irgaben ich wil vch sagen
0,157 Mit namen die stete die er gewan
0,158 vn- tet sie gote vnd'tan
0,159 An der vart gegin jherosolimis
0,160 archas . dar nach tripolis
0,161 Die v'merte stat biblyum
0,162 sydon vor der berichtvm
0,163 Akers dar nach kayphas
0,164 Cesarea ir ovch eine was
0,165 In ackers dirre gotesman
0,166 die burc schandalunn er gewan
0,167 Er gewan joppen vn- assur
0,168 dar nach vor knigesberc er fur
0,169 Die er gewan . er tet noch me
0,170 er gewan den tvrn in syloe
0,171 Die burc malve ein vestez werc
0,172 er gewan . vn- dar nach kaynsberc
0,173 In philistim pharan
0,174 die stat er sturmlich gewan
0,175 Er het nv volkes groze craft
0,176 vn- gar werliche ritterschaft
0,177 pharan lac nahen dem nylo
0,178 in eine sucht viel der herre do
0,179 Als in got haben wolde
0,180 vn- er nicht mer hie solde
0,181 wesen in dirre iamercheit
0,182 vnser herre nach siner arbeit

0,183 Nach der Sigenvnft tzv lone
0,184 wolde im des siges crone
0,185 In der hymele jerosolimis
0,186 bisteeten da dihein arbeit is
0,187 Svnd' frevde an alle iamercheit
0,188 Rue an alle arbeit
0,189 // Dirre kvnig gote getruewe
0,190 mit voll' bichte . mit gantzer ruewe
0,191 Gespiset mit dem lebenden brote .
0,192 vf gap er die sele gote
0,193 Wie grozlichen swere
0,194 vm in bitrubet were
0,195 Die lobeliche cristenheit
0,196 mit fursten mit der phaffheit
0,197 In volclagender iamercheit
0,198 nicht gar wirt vch daz giseit
0,199 // Als vor lebende der werde
0,200 mit vollem flize des gerde
0,201 Wie an tvgenden d' vorneme
0,202 tzu jherusalem er qveme
0,203 Mit eren als er solde
0,204 Sin kvniclich recht da holde
0,205 Also in in die stat
0,206 bracht toten mit eren hat
0,207 Der patriarche vn- doch in iamercheit
0,208 die bishofe mit der phaffheit
0,209 Nach cristenlichem rechte do
0,210 des ersten tzu dem templo
0,211 Als im daz ampt da geschach
0,212 tzv m spital sie trugen in dar nach
0,213 Mit gesange doch in vngehabe
0,214 dar nach tzv m heiligen grabe
0,215 Von dan vz tzu golgatha
0,216 Baldewinen sie bigruben da
0,217 An werdicheit den claren
0,218 nach sibenzehen iaren
0,219 Vn- vorbaz drier mande me
0,220 als er in edisse
0,221 Wart gecronet werdliche
0,222 tzu jerusalem deme riche
0,223 Iz het der kvnic Baldewin
0,224 einen werden mag sin
0,225 Gegeben tzu herren der stat
0,226 edisse . der mit hoher tat
0,227 Het erworben daz man in
0,228 sagte einen den besten ritt' sin
0,229 Als in die cristenheit da het
0,230 vil leides er den heiden tet

0,231 Er hiz ouch Baldewin von burgo
0,232 den namen mit vollem rate do
0,233 Von edissa die fursten sie kvrn in
0,234 tzu herren vn- kvnic solde er sin
0,235 Vn- gewaldic vf syone
0,236 mit eren nam er die crone
0,237 Syon der berc genennet is
0,238 vf den jerosolimis
0,239 Ist gebuwet dirre Baldewin
0,240 ein menlich helt ist er gesin
0,241 In allen wis gar lobeliche
0,242 was er vor . deme riche
0,243 Ein menlich helt giwere
0,244 den sarrazinen givere
0,245 Kvne . milte . tzu gote wis
0,246 des furt sin name noch hohen pris
0,247 Der heidschaft bitwanc er vil
0,248 hie mit ich in lazen wil
0,249 Als er ginendicliche
0,250 v'richtet het daz riche
0,251 Vn- er daz hymelrich erwarp
0,252 nach dem tzehenden iare er starp
0,253 Nach im was als ich vch sage
0,254 groz weinen er wart mit voller clage
0,255 Nach kvniclichem werde
0,256 gegeben der erde
0,257 Tzu golgata da ihesus crist
0,258 durch vns gecruziget ist
0,259 Als diz erginc nicht lanc dem na
0,260 die fursten mit frage suchten da
0,261 Ob da noch were ieman
0,262 der mit der sippe tzuge an
0,263 Gotfriden . daz er vor qveme
0,264 die crone daz riche nene
0,265 Sie wolden in tzu herren han
0,266 die mageschaft tzoch sich nieman an
0,267 ane kvnic wolden si nicht sin
0,268 Si wurden tzu rate so vndir in
0,269 Ire boten die herren sanden
0,270 den fursten tzu duetshen landen
0,271 Daz einen kvnic in geben die
0,272 gimeine des bigerten sie
0,273 Ir bete snel dar an geschach
0,274 fulkonem von andernach
0,275 Einen herren wis von arde ho
0,276 vbersanten sie in do
0,277 An dem man nicht nvr wurde vant
0,278 er was mag des kvniges von engellant

0,279 Menlich ein ritter vzerwelt
0,280 als man spricht ein warer helt
0,281 Milte . wise . warhaft
0,282 er wart ein shur der heidenschaft
0,283 Der er sit vil von libe tet
0,284 tzwene svne fulko het
0,285 Baldewinen vn- almerich
0,286 mit den er vb'machte sich
0,287 Ouch mit erlicher rittershaft
0,288 werlich vn- manhaft
0,289 Als der herre vber quam
0,290 die cristenheit in gerne nam
0,291 Sie enphiengen in liepliche
0,292 gecronet tzu dem riche
0,293 Wart er mit grozen eren .
0,294 bi im bigonde sich meren
0,295 Die cristenheit . die heidenschaft
0,296 nam abe . grozlich an ir craft
0,297 An in er prises vil erwarp
0,298 ouch den hymellon . do fulko starp
0,299 Vn- er mit eren wart bigraben
0,300 als die kvnige ir recht des haben
0,301 Nv was der edele fulko
0,302 dem riche vor giwesen so
0,303 Diz wolden sie im tzu eren tvn
0,304 die fursten Baldewinen sinen svn
0,305 Croenten vn- kvrn an in
0,306 gewihet tzu kvnige wart er in
0,307 Ein vnhelsame pine
0,308 vn- ein hagel der sarrazine
0,309 Die wile er lebte so was der
0,310 kurzlichen doch starp er
0,311 In clagte starc die cristenheit
0,312 mit eren tzu grabe wart er gileit
0,313 Vnd' einen tuerlichen sarch
0,314 dar an sines namen march
0,315 Man vant geschriben alda man las
0,316 wie er an tvegenden bluende was
0,317 Nach im an daz riche
0,318 sie namin amelriche
0,319 Baldewines bruder der ouch daz
0,320 in voller wurde bisaz
0,321 Tzu wibe er eine gravin
0,322 nam . sie was sin magin
0,323 ER tet ouch we den heiden
0,324 sit er mvste sich scheiden
0,325 Von ir daz gap in geistlich recht
0,326 vn- ir sippe die rede ist slecht

0,327 Doch also daz haben gelesen wir
0,328 tzwei kint het er mit ir
0,329 Einen svn d' hiz ouch baldewin
0,330 vn- Sibillan ein ivncvrowelin
0,331 // Als die sheidunge geschach
0,332 vber etliche iar dar nach
0,333 Dirre kvnic amelrich
0,334 mit manvhele er frvnte sich
0,335 Dem kvnige von Crichenlande
0,336 Sin na magin im der sande
0,337 Die im mit grozen eren qvam
0,338 amelrich si tzu wibe nam
0,339 Mit der er eine tochter het
0,340 ysabel der name stet
0,341 Do amelrich an disem leben
0,342 het den geist vf gigegeben
0,343 Ouch nach grozer arbeit
0,344 die er in gotes dienste leit
0,345 Vn- er tzu grabe was gileit
0,346 nach der kvnige gewonheit
0,347 Tzv kvnige den svn sinen
0,348 man cronte baldewinen
0,349 Sines mvtes allen luten slecht
0,350 Menlich wise da bi gerecht
0,351 Als ein hobsh magt gar tzvchtic
0,352 der h're was miselsuchtic
0,353 Daz woste an im baldewin
0,354 ane wip er wolde sin
0,355 Vn- leben kvshliche
0,356 grozer tvgende riche
0,357 Er was . vn- ouch von groz' tat
0,358 ein miltez herze er hat
0,359 Semftmvtic wol gesit
0,360 vf lange iar was iz gefrit
0,361 Tzwissen im vn- den heiden
0,362 vn- daz von in beiden
0,363 V'vestent vn- gemacht also
0,364 daz iz was stete ez was ouch do
0,365 Der tzit bi im ein grave wert
0,366 der hohen pris vnervert
0,367 Mit menlicher ritterschaft
0,368 het erworben an der heidenschaft
0,369 Wilhalm was von grozer tat
0,370 der margrave Cvnrat
0,371 Sin bruder was von montferra
0,372 der herre was ouch der tzite da
0,373 Der erliche kvnic baldewin
0,374 Sibillan die shone swest' sin

0,375 Mit magtvmlichem liebe
0,376 wilhalme er gap tzu wibe
0,377 Die graveshaft tzu joppen mit der
0,378 wol mochte sich des frowen er
0,379 Sibilla wart swanger vn- gebar
0,380 einen svn shonen gar
0,381 Wilhalm man ouch tovfte in
0,382 d' vater sich frovte des svnes sin
0,383 Der doch kvrtzlich starp dar nach
0,384 an im groz shade do geschach
0,385 Vn- leide baldewinen
0,386 den jvngen oheim sinen
0,387 Het er lieb von h'zen gar
0,388 do der gewuchs in daz zwelfte iar
0,389 Da cronte zv knige baldewin
0,390 von tripole bivalhe er in
0,391 Dem graven Reimvnde
0,392 tzu hvte als er im gvnde
0,393 Wol gvtes . do was er wol biwart
0,394 mit reymvnde . da was von hoh' art
0,395 Von lilingen geborn ein ritter gvt
0,396 des libes shone menlich gemvt
0,397 Des gutes arm . tzu man kos in
0,398 von joppen die gravin .
0,399 Sibilla . iz was ir bruder leit
0,400 der kvrtzlich an d' vzsetzicheit
0,401 Starp . er wart tzu golgata
0,402 gileit nicht vberlanc dar na
0,403 Als in wolde haben got
0,404 lac wilhalm d' iunge tot
0,405 Der als daz heishet kniclich art
0,406 mit grozen eren bistatet wart
0,407 Doch mit voller iamercheit
0,408 bi die knige hin gileit
0,409 Sibilla was sinnen riche
0,410 dar nach kvrtzliche
0,411 An eraclio sie daz gewan .
0,412 vn- an den fursten . daz ir man
0,413 Gwido tzu knige wart gekorn
0,414 gecronet . daz was dem graven zorn
0,415 Von tripele reymvnde
0,416 wan er noch vormvnde
0,417 Was des riches vn- man hat
0,418 gecronet in ane sinen rat
0,419 Gwiden vn- siner wirtin
0,420 Reymvnt ir vient des wolde sin
0,421 Ir shaden er warp wo er daz
0,422 v'mocht . er was in starc gehaz

0,423 Von monteral der furste Reinolt
0,424 bi Reimvnde des ligen wolt
0,425 Den fride den bi stete
0,426 der getruwe baldewin hete
0,427 Sibillen bruder mit der cristenheit
0,428 vn- mit den heiden den v'sneit
0,429 Wer wil im des wesen holt
0,430 von monteral grave Reinolt
0,431 Mit einem rovbe den er nam
0,432 da von grozer iamer qvam
0,433 Von babilone der soldan
0,434 Salatyn alle sine man
0,435 Er bisante in al der heidenschaft
0,436 vor jervsaleme fuer er mit craft
0,437 Gwido mit den sinen
0,438 streit mit Salatinen
0,439 Nicht wol iz do den cristen gie
0,440 ich meine den sig v'lurn sie
0,441 Gevangen wart Gwido
0,442 mit im alle die fursten do
0,443 Waz er der in dem strite hat
0,444 Salatin gewan die stat
0,445 Jherusalem . mort da irginc
0,446 wen er wolde den vinc
0,447 Er . die and'n sluc man tot
0,448 als in daz Salatin gebot
0,449 Alle die hus . vn- gar die stete
0,450 waz so der kvnic der inne hete
0,451 Svnd' surs alleine die gewan
0,452 mit craft der Soldan
0,453 Etliche er hilt etliche er brach
0,454 den rovp er vngefuge rach
0,455 Den reinolt nicht wol genumen hat
0,456 vnsers h'ren crutze von d' stat
0,457 Jherusalem nam Salatin
0,458 vn- furte iz mit im hin
0,459 Not leit nv die cristenheit
0,460 von der tzeit daz die mensheit
0,461 Got vnser herre enphie
0,462 als daz tzu salden vns irgie
0,463 So hetten sich des ergangen aldar
0,464 tvsent vn- hvndert iar
0,465 Siben vn- achzic dar nach
0,466 daz leit der cristenheit geschach
0,467 Die het nv vestenvnge nicht me
0,468 nvr surs die hiz vor tyre
0,469 Der margrave Cvnrat
0,470 von monv'ran qvam d' stat

0,471 Tzu helfe . vn- da der cristenheit
0,472 von der er ofte bistreit
0,473 Die heiden er tet in grozen schaden
0,474 si waren starc mit im v'laden
0,475 Als ein man ein werlich helt
0,476 er werte in wazzer vn- alle velt
0,477 Wa so si im erbuten sich
0,478 da gesigte er an in menlich
0,479 Er het docht nicht grozes hers
0,480 in dem hertzen des mers
0,481 Liget surs . nv qvamen die mere
0,482 wie grozlichen were
0,483 Bikvmmert die cristenheit
0,484 in die werlt vn- waz di iamers leit
0,485 Von den heyden vber mer
0,486 wie daz sie hetten cleine wer
0,487 Daz irwegete swerliche
0,488 hir alle der cristen riche
0,489 Daz volc der mere bitrubet wart
0,490 etliche lobten die vbervart
0,491 Tzu helfe dar chvmen der cristenheit
0,492 der verte die ersten waren bireit
0,493 Die menlichen lampartare
0,494 als die edelen romere
0,495 Venediere
0,496 vn- Genuvere
0,497 Ouch and' stete vil mit in
0,498 die starc ouch in lamparten sin
0,499 Mit einem werlichen her
0,500 v'solt sie qvamen vber mer
0,501 Worden ledic vz ir haft
0,502 der gevnernten heidenschaft
0,503 Was nwwens der kvnic gwido
0,504 dise geste enphinc er fro
0,505 Gwido het tzu helfe noch
0,506 die vesten vn- anthioch
0,507 Tripele karte wider an in
0,508 vn- wolde im tzu helfe sin
0,509 Der kvnic Gwido suchte rat
0,510 an margraven Cvnrat
0,511 Von montv'ra vn- bat in
0,512 daz er sin helfer wolde sin
0,513 Do rit im der marchis
0,514 als er was der sache wis
0,515 Daz er vor akers legerte sich
0,516 der rat was bihegelych
0,517 In allen . also si waren da .
0,518 akers phtoloniayda

0,519 Hiz vor . diz was ir allir kvr
0,520 Sie qvamen ritterlich da fur
0,521 Der kvnic vn- al die sine
0,522 ovch die werden lampardine
0,523 Der getzelt sach man da riche
0,524 vf geslagen . kostliche
0,525 Was sin alles irdacht
0,526 waz sie mit in hetten bracht
0,527 Tzu der stat menlich
0,528 dicke sie v'suchten sich
0,529 Vnv'drozzen mit ir ritterschaft
0,530 So was tzu cleine ot noch ir craft
0,531 Die sarrazine crefticlich
0,532 die stat werten vn- menlich
0,533 Salatine von babilo
0,534 qvamen nv des di mere do
0,535 Gegen den cristen tzu wer
0,536 mit gar creftigem her
0,537 Er quam . nv gedachte der soldan
0,538 gewis sie alle gevangen han
0,539 Vn- wie si gireite weren sin
0,540 er sprach "ir kvmt diheiner hin"
0,541 Iz were ouch in geshehen so
0,542 ir was zv cleine nv sehet wo
0,543 Vnser herre in helfe sande
0,544 von dem mer tzu lande
0,545 Sie sahen kvmen koken kil
0,546 Galinen barken sigelten vil
0,547 Dar vffe volkes groze craft
0,548 mit gar werlicher ritterschaft
0,549 Als got tzu troste gap die disen .
0,550 in qvamen vil der thenen ouch d' frisen
0,551 Normane schotthen vn- noch me
0,552 von allen landen alvm die se
0,553 Werlich tzu strite gar
0,554 Sie quamen in cristes ere dar
0,555 Die mit eren Gwido
0,556 enphinc er was ir kvemfte fro
0,557 Vndir in als ich vch sagen wil
0,558 werlich ir qvam tzu fuze vil
0,559 Der frisen als sie des haben siten
0,560 d' minner teil was der geriten
0,561 vz den and'n die grosten shar
0,562 wol georset qvamen dar
0,563 Dise sich hilden svnderlich
0,564 in viere daz her do leite sich
0,565 Kvnic Gwiden was sin schade leit
0,566 vn- ouch d' gebreche d' cristenheit

0,567 Er suchte helfe vn- rat
0,568 an den margraven Cvnrat
0,569 Von montv'ra wande er woste in
0,570 alle tzeit tzu svlchen noten sin
0,571 Endehaftes rates wis
0,572 er sprach "ey werder marchis
0,573 Ich clage vch mine grozen leit
0,574 noch mer die not der cristenheit
0,575 Ir wizzet wol wie grozlich
0,576 die hat bisweret . vn- mich
0,577 Von babilo salatin
0,578 nv sprechet waz mac daz wegeste sin
0,579 Der cristenheit vn- mir
0,580 wolt vns an im gerechen wir
0,581 Daz got des si gieret
0,582 ir horet wol wie er keret
0,583 An vns mortgitigen haz
0,584 vn- trachtet stete wie daz
0,585 Er v'terbe die cristenheit
0,586 ich clage vch nicht eine mine leit
0,587 Svnd' gotes . vn- ouch d' mvter sin
0,588 d' hohen hymelkvnigin
0,589 Ir horet wie allertegelich
0,590 er in tzu laste' samnet sich"
0,591 Do sprach der herre von monv'ran
0,592 "iz beste were vch getan
0,593 het ir des volle craft
0,594 vn- ouch an der ritterschaft
0,595 Daz ir gewinnen dise stat
0,596 so man her gilegert hat"
0,597 "Gevellet vch daz" sprach Gwido
0,598 "ja" sprach der marchis . do
0,599 Sprach d' kvnic . "vns chvmet noch
0,600 der prinze von anthioch
0,601 Vn- kvnic lewe der menliche
0,602 von vbia der lobeliche
0,603 In strite . vmme d' cristen not
0,604 Sich herte er ie den vienden bot"
0,605 Also ein ende nam der rat
0,606 do reit margrave Cvnrat
0,607 Heim tzu surs in sine stat
0,608 ich wene er brive enphangen hat
0,609 Von dem soldane heimiliche
0,610 Gwiden nicht frumeliche
0,611 Sit sagte man die sin .
0,612 des man dar nach shuldigete in
0,613 Ein erlich her Gwido hat
0,614 Nv vor akers der stat

0,615 Noch qvamen im liebe mere
0,616 wie daz vb'chvmen were
0,617 Vf dem mer werliche
0,618 der edele erliche
0,619 Sinen frvnden d' suze gemvte
0,620 der vienden der vngute
0,621 Der vornemer . werder . milder .
0,622 den vntvgenden der wilder
0,623 Den tvgenden giheim . der wise .
0,624 volkvmen an lichtem prise
0,625 An furstlichen arde
0,626 nach eren der wol gebarde
0,627 In strite des mvtes veste
0,628 ein ritter er was der beste
0,629 Als man in bi sinen tziten vant
0,630 im gewarte willic der dvringer lant
0,631 Dar inne gar die ritterschaft
0,632 er het got geforcht von aller craft
0,633 Sines herzen . Adelet hiz sine wirtin
0,634 Lvdewig was der name sin
0,635 Der lantgrave von des landes craft
0,636 des im was die herschaft
0,637 An voller gebite
0,638 ein vient der heidendiete
0,639 Der erlichen cristenheit
0,640 er quam tzu grozer selicheit
0,641 Tzu ewigen pinen
0,642 den gevnerten sarrazinen
0,643 Die er warf an daz gevelle
0,644 der bitterlichen helle
0,645 Da vor vns got bihvete
0,646 durch alle sine gvete amen
0,647 Des lob tzu witem fluge vert
0,648 furstlicher wurde vnv'sert
0,649 Der irbeizete von dem mer
0,650 vz den shiffen mit sinem her
0,651 Vor tyre die man nennet surs
0,652 ich denke alsulches nakeburs
0,653 Vn- sin biwesens gerne
0,654 wolden da enperne
0,655 Die sarrazine mocht iz in
0,656 gischehen . si lizen z also sin
0,657 Der margrave Cvnrat
0,658 den lantgraven in die stat
0,659 Mit allen den sinen do
0,660 liplich enphinc vn- fro
0,661 Als daz tzam siner werdicheit
0,662 bi einander wart in gileit

0,663 Die herberge vn- gigen
0,664 nach einer tzil daz was in eben
0,665 Den gesten vn- was ir wille wol
0,666 als man liber frvnde sol
0,667 Phlegen vn- shaffen rat
0,668 also d' furste Cvnrat
0,669 Den ersten tac die nacht dem nach
0,670 mit grozem vollen sie bisach
0,671 Iz mochte wol sin vn- hette fug
0,672 jtwederthalben was sin gnvc
0,673 Dise rede ich meine so
0,674 als iz der wirt v'mochte do
0,675 Er wirte sie frolich gemvt
0,676 daz namen die geste gar vor gvt
0,677 In genvgte gvt was ir gemach
0,678 an dem andern tage dar nach
0,679 Als er was snier kvmfte fro
0,680 qvam der kvnig gwido
0,681 Vor surs irbeizte er vf daz velt
0,682 nahen der borte sin getzelt
0,683 Gegen den schiffen tzoch man vf
0,684 also daz der kvnic schuf
0,685 Der en wolde nicht in die stat
0,686 in en lude der furste Cvnrat
0,687 Der wirt da traege gebarte tzv
0,688 der kvnig die schif wol marcte nv
0,689 Wi die bireit waren tzu lobe
0,690 vn- wi d' einem swebte obe
0,691 Ein banir von phelle lazurvar
0,692 dar in ein lewe lustiger gar
0,693 Gesniten rot dar vnd' wiz
0,694 als der meist' dar an legte fliz
0,695 Des zeichens hvndert shilde also
0,696 da bi der kvnic marcte do
0,697 Des herren her vn- sine macht
0,698 wie er het hvnd't ritte' bracht
0,699 Ane die den gihorten tzv
0,700 bireit was d' lantgrave nv
0,701 Abe er tzu dem kvnige reit
0,702 daz wolde an im sin hofsheit
0,703 Als er was tvgentlicher site
0,704 Jm reit sin werder bruder mite
0,705 Der prises gernde herman
0,706 vil graven frien dienstman
0,707 Vil werder ritter die ich her nach
0,708 vch nennen sol d' kvnic nv sach
0,709 Sie abe riten von der stat
0,710 di herren er mite riten bat

0,711 Die werden geste enphan
0,712 daz wart mit willen getan
0,713 Lieplichen vn- fro
0,714 di geste wurden enphanen do
0,715 Von dem kvnige vn- al den w'den gar
0,716 als si het bracht der kvnic dar
0,717 Daz wart in v'golden suze
0,718 mit hovbshem widergruze
0,719 Dise tzwene von art die claren
0,720 daz sie gebruder waren
0,721 Daz biwiste ir glich gestalt an in
0,722 ouch einer gebare sie sin
0,723 Gewesen ir site tvgentlich
0,724 ebenes mvtes menlich
0,725 Des liebes starc volkvmen gar
0,726 an al ir liden lichtgevar
0,727 Was ir anshowen brvnreidez har
0,728 stete an ir Worten war
0,729 Vollic vf gewachsen ho
0,730 mit in irbeizte Gwido
0,731 Vor sinem gitzelde er sich
0,732 satzte mit in clagelich
0,733 Der bitrubte kvnic Gwido
0,734 Siner rede bigonde also
0,735 "Gelobt si der starke got
0,736 er hat sines volkes not
0,737 Vaeterlich mit vch bidacht
0,738 vn- ouch mich . d' vch vns bracht
0,739 het tzu helfe . ewer kvmft
0,740 ist vnser gewisse sigenvnft"
0,741 Aber sprach der kvnic do
0,742 "der soldan von babilo
0,743 Hat mir vnmazige leit
0,744 an der gotes cristenheit
0,745 Getan . also iz vns irgienc
0,746 an eime strite er mich vienc
0,747 Vn- gar die besten die mit mir da .
0,748 tzu velde waren dem strite na
0,749 Waz der besten gevangen was
0,750 vz den andern er die las
0,751 In sine haft nam er die
0,752 toten er die andern lie
0,753 Vnd' den manic werlich man
0,754 der cristenheit ist abe gegan
0,755 Jherusalem er gewan
0,756 daz heilige crutze nam er von dan
0,757 Noch tvt er tegeliche leit
0,758 vnmaziche der cristenheit

0,759 Nu sit ir herre vns kvmen hie
0,760 lazet vns v'nemen wie
0,761 Ir hie tzu gebaren welt"
0,762 vnv'tzaget als ein helt
0,763 Sprach der lantgrave do
0,764 "herre ich bin kvmen so
0,765 Mit mir min bruder herman
0,766 ouch waz wir der vnsern han
0,767 Daz wir ane bitragen
0,768 in cristes ere wagen
0,769 Als er v'goz durch vns sin blut
0,770 wollen den lip . tzerne daz gut
0,771 Fro . vn- willic gemvt
0,772 waz d' soldan tzu vneren tvt
0,773 Gote vn- siner cristenheit
0,774 daz ist vns in gote leit
0,775 Also v're so wir z v'mvgen
0,776 vn- wir tzu wer gegin im tvgen
0,777 So welle wir im biwisen daz
0,778 ist er vns vint vn- gehaz
0,779 Daz selbe hat ouch er von vns
0,780 durch die libe des gotessuns"
0,781 Dirre rede wol fro
0,782 wart der kvnic . ab' so
0,783 Sprach der lantgrave "saget mit
0,784 sit frvnt . der margrave vn- ir"
0,785 Der kvnic sprach "vornames sin
0,786 frvent ich gentzlichen bin"
0,787 "wil er vch helfen ." aber sa .
0,788 fragte in der lantgrave . da
0,789 Sprach der kvnic "gentzlich
0,790 nicht wol zu helfe er stellet sich
0,791 Noch er hat vns helfe v'sagt
0,792 do ich im nuwes vor akers claget
0,793 Der cristen leit mine not
0,794 nicht mer trostes er mir bot
0,795 Nur daz er sprach ez ist min rat
0,796 v'mvget ir z so bisitzt die stat"
0,797 "// Also sol daz nicht sin"
0,798 Sprach der lantgrave . "wir svlen in
0,799 Vmme helfe biten er ist des wert
0,800 hat in ieman biswert
0,801 Oder bitrubet dihein man
0,802 duch die gotes libe daz lan
0,803 Ouch durch vnser bete er sol
0,804 wir durfen siner helfe wol"
0,805 Mit dem lantgraven Gwido
0,806 tzu dem margraven riten do

0,807 Vmme helfe sie baten in
0,808 die er gar v'sagte in
0,809 Dar vndir doch rede vil geschach
0,810 beidersit . der margrave sprach
0,811 "Ich habe gentzlichen . mit
0,812 dem soldane . mich gefrit
0,813 Daz ich im stete halden wil
0,814 der kvnic hat ritterschaft vil
0,815 Er enpirt nv wol der helfe min"
0,816 noch v'suchte sich sunderlich an in
0,817 Der lantgrave mit starker bete
0,818 als er im vor gesaget hete
0,819 In der rede stunt er vast
0,820 der wirt . der edele sin gast
0,821 Wart starke des bitrubet do
0,822 als wart ouch kvnic gwido
0,823 Dar vnd' in der lantgrave bat
0,824 daz er mvste in siner stat
0,825 Sin gvt tzeren da
0,826 der wirt sprach gutlichen ia
0,827 Wie vn- er wolde
0,828 alda er wesen solde
0,829 Tzv dem lantgraven do
0,830 sprach der kvnic Gwido
0,831 "Sit vns der margrave Cvnrat
0,832 helfe v'saget hat
0,833 Ein gut trost vns daz is
0,834 herre wir haben vch gewis"
0,835 "Daz habt gentzliche"
0,836 sprach der mvetes riche
0,837 Ludewig . "als ich vch sage
0,838 lat vns hie ruen achte tage
0,839 Herre . so iz in fride staet"
0,840 daz der kvnic vor gvt het
0,841 Der lantgrave aber do
0,842 sprach tzu dem kvnige so
0,843 "Ane sorge ir weset min .
0,844 vn- aller der die mit mir sin
0,845 Her kvmen . nicht en beitet
0,846 tzu dem her ir reitet
0,847 Vn- sehet daz sie vnfugen nicht
0,848 wand iz ofte also geshiht
0,849 Waz so die eldesten sprechen
0,850 daz die iungen iz v'brechen
0,851 Als sie mvtwillic sin"
0,852 tzu dem heer reit nv hin
0,853 Der kvnic er brachte in mere
0,854 daz in tzu helfe were

0,855 Der lantgrave vn- wie in hat
0,856 helfe v'sagt her cvnrat
0,857 Des lantgraven sie waren fro
0,858 vf den margraven sie sprachen so
0,859 Er tete iz vnbilliche
0,860 vn- er het lesterliche
0,861 Sich gefrit mit dem von babilo
0,862 ouch was noch ir rede so
0,863 Er het des gelt von im genvmen
0,864 der solt im nicht tzv nvtze chvmen
0,865 Er solt sin immer laster han
0,866 der rede wart da vil getan
0,867 Dise rede vnd' den besten lif
0,868 nv waren des lantgraven schif
0,869 Vf dem mer als er die vb' bracht
0,870 het vn- richlich bidacht
0,871 Mit kost vn- wes man dorfte dar tzv
0,872 die sahen dise kvmen nv
0,873 Die vor ackirs lagen . do
0,874 Sprach der kvnic gwido
0,875 "Ich sehe des lantgraven levn
0,876 chvmen . wol mvge wir vns sin frevn"
0,877 Daz volc tzu dem stade lif
0,878 ouch die v'richten die schif
0,879 Die lizen gen tzu r borte die
0,880 vz ir anker wurfen sie
0,881 Als si des sin biwiset do
0,882 vn- beiten irs herren kvnft so
0,883 An dem andern tage dar nach
0,884 des banyr man lichte irshinen sach
0,885 Als vm mitten morgen frv
0,886 mit der in werlich kvmen tzv
0,887 Ludewigen vn- herman
0,888 mit in gar die werden man
0,889 Als si die bracht hetten dar
0,890 biricht ritterlichen gar
0,891 Mit wapen als sie vestgemvt
0,892 waren irwelte ritter gvt
0,893 Von hoh' geburt die claren
0,894 hvndert ir da waren
0,895 Die tzirte der ritterschefe recht
0,896 ouch in manic tuew' edeler knecht
0,897 Reit mite menlich gar
0,898 ir allir wapen lichtgevar
0,899 Einer varwe gelich
0,900 waren in da wunneclich
0,901 Ir wapencleit lazvrbla
0,902 dar vf der bunte lewe da

0,903 Was gestrowet wol lvsticlich
0,904 al ir kovertuere dem glich
0,905 Ir helme wunnecliche
0,906 getziret richliche
0,907 Wol georset sie tzuken tzv
0,908 mit al den werden Gwido nv
0,909 Den herren was engegen kvmen
0,910 si worden frolich genvmen
0,911 Da in die erliche bruderschaft
0,912 tzu der gotes ritterschaft
0,913 Von dem spitale
0,914 sente johannis mit manigem frale
0,915 Mit manigem tuevern ritte' sie
0,916 sines ordens enphie
0,917 Der hohemeister vn- fro
0,918 Sam taten die tempilbrud' do
0,919 Die von dem duetschen huse dem gelich
0,920 vn- envollen liplich
0,921 Die hetten des recht wand er in
0,922 ein svnd'lich helfe ist gesin
0,923 Tzu bistetene ir orden
0,924 sin mvt was des nie enworden
0,925 Noch er wolde des v'tzagen
0,926 er n wolde volle kost tragen
0,927 Ouch gegen den vienden tzu wer
0,928 menlich vf strites tzer
0,929 Wa man solde nach prise striten
0,930 vn- hoveslichen riten
0,931 Ein wazz' nahen akirs floz
0,932 als iz noch tvt des genoz
0,933 Die stat des hvote vn- an iz
0,934 so hette si wazzers bosen niz
0,935 Si mvste des liden swere
0,936 ob si des enpere
0,937 Bi daz wazzer vf das velt
0,938 hiz der lantgrave die getzelt
0,939 Vf slahen richer koste gar
0,940 als si die bracht hetten dar
0,941 Die graven frien dienstman
0,942 wol wart getziret nv der plan
0,943 Vor akirs vn- vberlusticlich
0,944 sie leiten tzu einem ringe sich
0,945 Daz gende volc ich sage vch wie
0,946 budten da al vmme sie . die
0,947 Herren . doch guter wise hin dan
0,948 ir was vil . vf den plan
0,949 Ludewig sin getzelt da sund'lich
0,950 het sin paulvn . ouch dem glich

0,951 Hette sinez bisvnd' herman
0,952 Sin bruder . d' iunge suze man
0,953 Des hoh prisende tat
0,954 tzu suzer rede bracht hat
0,955 Her wolfram von essenbach
0,956 gegen des brud' getzelde vb' den bach
0,957 Iz waz vf getzogen als daz shuf
0,958 Ludewig der herre gesniten vf
0,959 Ir beider getzelt der lewe da
0,960 in ein gar tuer obdach bla
0,961 Vf al der h'ren getzelden so
0,962 lac ie des herren tzeichen do
0,963 In wunneclichem werde gar
0,964 was mit den langraven dar
0,965 Kvmen der grave von gelre
0,966 bi den het der von merlre
0,967 Ein ritter geherbergit vf den plan
0,968 nicht gar rich doch ein erlich man
0,969 Ein durinc des wolde in
0,970 der grave nahen im sin
0,971 Durch daz er was ein hobsh man
0,972 albrecht ein lustic kvnpan
0,973 // Da was d' burcgrave von aldenburc
0,974 Tzulish wise tzu strite clug
0,975 Der heidenschaft tzu nide
0,976 was da der vog von ride
0,977 Witkhe was geheizen der
0,978 d' heiden tot was sin ger
0,979 // Der grave albrecht von popenburc
0,980 da was des manic w'lich turc
0,981 In strite vnergezt enghalt
0,982 d' von im tot wart gevalt
0,983 // Da was d' grave von arnstein
0,984 walth' d' gute vn- doch ein
0,985 Menlich wolgeborn' helt
0,986 sin tat tzu prise was getzelt
0,987 // Heinrich von helderunge
0,988 d' starc freche ivnge
0,989 Die banir was bivolhen deme
0,990 die er furte ane alle sheme
0,991 // Der sich wolt vinden in voller wer
0,992 d' erliche grave gvnth'
0,993 Von kevernberc da shone lac
0,994 na im da ein sin werder mac
0,995 // Von bichlingen d' grave friderich
0,996 von swartzburc der grave heinrich
0,997 Gerichet gar aller tvgende
0,998 an prise sich wol v'mvgende

0,999 Nach dem so wolt er werben ie
0,1000 // die wile er lebte . d' grave von wie
0,1001 Bertolt d' menliche
0,1002 lac da ouch werliche
0,1003 Den heiden ein strenge lage
0,1004 d' lantgraven mage
0,1005 Von hohem arde die claren
0,1006 da mit ir frvnden waren
0,1007 // Tzu liebe der hymele maiestat
0,1008 von oxseburc grave cunrat
0,1009 Der hoher tuere gernde
0,1010 was ie . sin pris ist wernde
0,1011 Noch vester vn- mvz ewic sin
0,1012 Mit im was da d' oheim sin
0,1013 // Lutolt der grave von pleyen
0,1014 als ein suz' regen des meyen
0,1015 Frevt daz ertriche vn- fruchtbere tut
0,1016 also d' milde suz'gemvt
0,1017 Erfruede waz so was kvmm'haft
0,1018 maenlich sine ritterschaft
0,1019 Er vbete in vollem prise
0,1020 nach gote d' werlde wise
0,1021 Siner gelubde siner worte war
0,1022 den vienden ein strenger var
0,1023 Sine tete sin nicht bliben
0,1024 noch sine tvgende vngescriben
0,1025 Wie er fur in werdicheit
0,1026 waz er prises ie irstreit
0,1027 Da ist ein buch von gemacht
0,1028 vn- tzu nvtz' rede bracht
0,1029 Wie er gap mit vollem amen
0,1030 nv habe wir sines samen
0,1031 Der anherre er ist gesin
0,1032 die tugentliche gravin
0,1033 Hie tzu lande maria sie
0,1034 ist genant ir brud' die
0,1035 Menlichen . ir geburt die claren
0,1036 von pleyen die herren waren
0,1037 Grave otto vn- grave cvnrat
0,1038 die mit prise bernd' tat
0,1039 Hie hohen rvm erwurben
0,1040 stritlicher not sie sturben
0,1041 Doch mit surem wid'gelde
0,1042 mit in vf kurtzem velde
0,1043 Al d' tzal von hart strites not
0,1044 tzalte man sechs hvnd't ligen tot
0,1045 Nicht v're von d' stat tzu la
0,1046 sie stalten grozen mein ouch da

0,1047 An den vngern die sie
0,1048 slugen tot also daz vie
0,1049 Vnmazen vil bleip der da
0,1050 tot . dise edele maria
0,1051 Het einen wirt d' ouch rich
0,1052 was eren . envollen menlich
0,1053 Von dem nwwenhvse so hiz der
0,1054 geborn von hohen graven her
0,1055 Von duringen misne swaben
0,1056 erlich gelebt sie haben
0,1057 Etsliche ir nv hie lagen bi
0,1058 dem lantgaven di
0,1059 Wol wagen torsten menlich gemvt
0,1060 durch got ir leben ouch ir gut
0,1061 Dirre vlrich vns nach im liz
0,1062 einen svn der ouch hiz
0,1063 Von dem nwwenhuse der h're vlrich
0,1064 wol mac v' war daz sprechen ich
0,1065 Als ich in gantz habe irkant
0,1066 alle guete ich an im vant
0,1067 Nach der waren libe gebote
0,1068 hitzige libe er tzu gote
0,1069 Het von aller siner macht
0,1070 tzu allen luten wol bidacht
0,1071 Im selben als der menshe sol
0,1072 sin geordent ouch den andern wol
0,1073 Aller gute was er gut
0,1074 da bi doch gar menlich gemvt
0,1075 D' arme vn- der riche
0,1076 waren im geliche
0,1077 Ein' libe lib het er sie
0,1078 in grozer demvt erte er die
0,1079 Armen . willic gar gemvt
0,1080 vn- teilte in sin v'lihen gvt
0,1081 Nach d' lere gebote
0,1082 daz er tzu lehene het von gote
0,1083 Den habenden ouch was er des bireit
0,1084 in gote nach siner werdicheit
0,1085 Ein frolich wirt den gesten gar
0,1086 sin hof selden der enpar
0,1087 Ein volkvmen wirt ouch gut
0,1088 Sinem gesinde vn- wol gemvt
0,1089 Ich sage vch nicht nvr war
0,1090 als ich in han irkvndet gar
0,1091 Hie mite lege wir daz nider
0,1092 vn- grifen an daz erste wider
0,1093 // So daz ich kurtze dirre rede werc
0,1094 da lac d' von kirchberc

0,1095 Der gar vestgemvten ein
0,1096 // der biderbe hartman von blanckenstein
0,1097 Der was da in groz' wurde
0,1098 in stritlich' girde
0,1099 Hie mite ich die rede kurzen wil
0,1100 noch hoher graven frien vil
0,1101 Herte ritte' biderbe knechte
0,1102 von edelem geslechte
0,1103 Wen so die v'bvnden
0,1104 die wol ir stat v'stvnden
0,1105 In strites gev'te
0,1106 menlicher tete herte
0,1107 Als er ie hoh' chost phlac
0,1108 d' lantgrave shone lac
0,1109 Vn- ouch die mit im da waren
0,1110 in richen gebaren
0,1111 Da was d' grave noch d' frie man
0,1112 nicht ane sinen kapelan
0,1113 Die gote tegeliche
0,1114 da dienten flizicliche
0,1115 Von al ires hertzen macht
0,1116 daz ampt in suzer andacht
0,1117 Die prister tzu eren da taten
0,1118 gote . vn- des baten
0,1119 In voll' andacht reine
0,1120 die werden gimeine
0,1121 Ane gotes libe die rittershaft
0,1122 het hie diheiner wurde craft
0,1123 Wie mac gut ritter er gesin
0,1124 d' nicht libet noch en suchet in
0,1125 Den herren der im die rittershaft
0,1126 an georden hat da bi die craft
0,1127 Daz er sin gut vn- sin leben
0,1128 mac in der viende hende geben
0,1129 Ouch in des mac binemen wol
0,1130 iz wollen die recht daz in sol
0,1131 Geforcht d' menshe eren
0,1132 wil er hie sin salde meren
0,1133 Ouch mit im ewicliche
0,1134 sin leben in hymelriche
0,1135 Die tueren dvringe
0,1136 alvmme tzu einem ringe
0,1137 Si hetten shone sich gileit
0,1138 ane hohvart in voller manheit
0,1139 Sie waren ane grozen bracht
0,1140 die ersten hute da der nacht
0,1141 Der grave hilt von gelre do
0,1142 die wart im geboten so

0,1143 Die nacht het ende des morgens frv
0,1144 als si des waren tzu rate nv
0,1145 Die dutshen worden gimeinlich
0,1146 bi den herren sie leiten sich
0,1147 Ouch waz der tempilherren was
0,1148 waz der in strite vor genas
0,1149 // Der hohemeister von sente iohanne
0,1150 mit manigem w'den manne
0,1151 Sines ordens ouch manigen w'den man
0,1152 dem er solt het getan
0,1153 // Die von dem dutshen huse na
0,1154 dem wazzter leiten sich ouch da
0,1155 Mit w'licher ritterschaft
0,1156 ir bruder als si der hetten craft
0,1157 // Hertzoge bertolt von meran
0,1158 tzu dem lantgraven vf den plan
0,1159 Sich leite mit eime frechen her
0,1160 menlich gemvt vn- wol tzu wer
0,1161 // Dar nach dar brachte manigen man
0,1162 d' margrave h'man
0,1163 Von baden die den heiden haz
0,1164 trugen . nach dem an daz
0,1165 Wazz' mit ein' erlichen rote
0,1166 als er di furte tzu dienste gote
0,1167 Tzu strite wol bireite
0,1168 der bishof sich leite
0,1169 Von wirzeburc der h're gotfrit
0,1170 im lagen die osterfranken mit
0,1171 // Mit den sinen dem na
0,1172 der bishof von ludecke da
0,1173 Rudoff sich leite ein selic man
0,1174 sines lebens er was . nach dem san
0,1175 Leite ein her wol ritterlich
0,1176 von basele d' bishof heinrich
0,1177 // Von regensburc der bishof cvnrat
0,1178 da ein erliche rote er hat
0,1179 Bishof albrecht von pazzowe
0,1180 dar brachte in werdem showe
0,1181 Ritte' knechte w'liche gar
0,1182 ein cleine rich birichte shar
0,1183 // Von misne bishof mertin
0,1184 da h'bergete neben in
0,1185 Mit im eine genendige rote
0,1186 als si da wolden wesen gote
0,1187 Tzu dienste gegen d' heidenshaft
0,1188 dar brachte ouch gute ritterschaft
0,1189 // Von oxsenbrucke d' bishof
0,1190 gesindes einen werden hof

0,1191 // Von auenb'c grave friderich
0,1192 dar brachte envollen menlich
0,1193 Ir rechten viende der sarrazin
0,1194 grave friderich von belgerin
0,1195 Dar brachte ein erlichez her
0,1196 rich getziret wol tzu wer
0,1197 // Von dornburc grave Cvnrat
0,1198 als er ein menlich hertze hat
0,1199 Selbe den vienden hart gemvt
0,1200 also irwelte ritte' gut
0,1201 Ouch knechte ein werliche shar
0,1202 brachte der herre mit im dar
0,1203 // Daz selbe sin brud' friderich
0,1204 brachte eine rote wnneclich
0,1205 Dem brude' leite er sich bi
0,1206 tzageheit was sin hertze fri
0,1207 // Dar sich ouch leg'te vf den sant
0,1208 grave florencius von hollant
0,1209 Sin bruder otto bi in
0,1210 von pevtheim als ich s biwiset bin
0,1211 Sie selbe vestgemvte
0,1212 irwelte ritte' gute
0,1213 Si brachten an den rivir dar
0,1214 eine creftige shar
0,1215 Getziret wunnecliche
0,1216 die gebruder envollen riche
0,1217 Sie waren des gutes
0,1218 also waren sie ouch des mvtes
0,1219 Nicht sich die lizen
0,1220 richer chost v'drizen
0,1221 Wo si die tragen solden
0,1222 // ouch ir pris da hohen wolden
0,1223 Tzwene gebrude' die ouch da waren
0,1224 von hohem arde die claren
0,1225 An d' gevneren heidenschaft
0,1226 si hetten die gute rittterschaft
0,1227 Si selbe valten manigen turk
0,1228 die burcgraven von magdeburc
0,1229 Vn- meine den edelen burchart
0,1230 vn- sinen brud' gebehart
0,1231 Ja haben die werden noch daz wort
0,1232 vn- iz ist witen gar gehort
0,1233 wi sie als getzogene meyde gar
0,1234 waren al ir site clar
0,1235 Hobsher gebare ir hertzen gut
0,1236 da bi doch menlich gar gemvt
0,1237 Ires lebenes reine
0,1238 den luten doch gimeine

0,1239 An helfe mit ir gute
0,1240 in suz wesendem mvte
0,1241 Sie wolden lan stete vinden sich
0,1242 fro . ir lebenes gotlich
0,1243 Si waren vn- ir wise slecht
0,1244 an al irim tvnde recht
0,1245 // Sich leg'te dar vf dar velt
0,1246 d' grave von mannesvelt
0,1247 Mit den sinen ritterliche
0,1248 in hohem w'de riche
0,1249 Fur er all' tete sin
0,1250 den bid'ben graven hiz man in
0,1251 Ein richez vmmeleger hat
0,1252 vn- creftic gar ackers die stat
0,1253 In driv geteilt lagen die her
0,1254 mit craft werte in daz mer
0,1255 Der eine teil vn- menlich
0,1256 diz was der stat gar shadelich
0,1257 Wan solde waz spise kvmen in
0,1258 daz mvste von dem mer sin
0,1259 Wie so vor akers nv al die velt
0,1260 trugen richeit b'nden gelt
0,1261 An den werden vn- voller tzirde do
0,1262 ich wene ir tzirde selden fro
0,1263 Der stat volc die machte
0,1264 vn- selden sie bilachte
0,1265 Noch wol si in bihagete
0,1266 den fride widersagete
0,1267 Die gotes erliche rittershaft
0,1268 dem soldane vn- siner craft
0,1269 Ludewig der wert genande
0,1270 d' lantgrave von duringen lande
0,1271 In hohem werde fur sin pris
0,1272 wol vorbidacht vn- wis
0,1273 Er was tzu sulchen dingen clug
0,1274 die chost der herre selbe truc
0,1275 Al ir malwerd die stat
0,1276 akers an dem wazzer hat
0,1277 Gar binam er in den nvtz
0,1278 er wiste hin dan den wazzers shutz
0,1279 Von ir mvlen in witen graben
0,1280 si mochten des keinen nvtz nv haben
0,1281 In tzu frvme- er irdachte
0,1282 als er die tzu brachte
0,1283 Mvlen almitten in dem her
0,1284 an daz wazzer doch nicht von groz' tzer
0,1285 Noch von groz' chost so waren die
0,1286 doch grozen nvtz ir hetten sie

0,1287 Ir marct von ludewiges her
0,1288 het sin groze biz an daz mer
0,1289 Ouch an der sit der stat
0,1290 Gwido der kvnic den sinen hat
0,1291 Den sinen ouch het daz dritte her
0,1292 daz tzwissen der stat lac . vn- dem mer
0,1293 Vn- iz werte der stat
0,1294 noch gaben in die mercte vollen rat
0,1295 Nv bisante sich ouch salatin
0,1296 wa so waren die sarrazin
0,1297 Tzu den er frvntshaft sich vor sach
0,1298 vmme helfe er die sprach
0,1299 An sinen brifen er in claget
0,1300 ouch mit den boten wi im ensaget
0,1301 Hetten die cristen vn- wie
0,1302 mit craft vor akers legen sie
0,1303 Vf shaden der cristenheit
0,1304 im qvamen wol bireit
0,1305 Vil kvnige der heiden fursten
0,1306 in menlichen getursten
0,1307 Mit in irwelte ritterschaft
0,1308 Salatin mit grozer craft
0,1309 Mit manigem stolzen sarrazin
0,1310 als die vf prises gewin
0,1311 Waren rich getziret gar
0,1312 chvmen in sin helfe dar
0,1313 Kvnige fursten graven frien
0,1314 werde ritter als ir amyen
0,1315 Sie nach minnegeldes lone
0,1316 hetten vz berichtet shone
0,1317 Kostlich nach richeit wurde
0,1318 ir helme ir tzimirde
0,1319 Ir shilde rich getziret
0,1320 manigen enden dar vf v'wired
0,1321 In liechtez golt manic tuer stein
0,1322 der von ir helmen ir shilden irshein
0,1323 Durchluechtic vn- heiter var
0,1324 in hoher wurde showe gar
0,1325 Also sie waren hohgemvt
0,1326 der sarrazine groz vberflut
0,1327 Als si ouch menlich waren
0,1328 in hochverte gebaren
0,1329 In wunnenvaren shine
0,1330 si volgeten salatine
0,1331 Dem soldane von babilo
0,1332 vor akers die werden cristen do
0,1333 Sie vmmeringeten vor der stat
0,1334 ie wider einen cristen hat

0,1335 Dar bracht tzu velde salatin
0,1336 hvndert tzu wer d' sarrazin
0,1337 In driv giteilt die ouch lagen
0,1338 grozer hochvart sie phlagen
0,1339 Tzu gut' maze v're gileit
0,1340 sie hetten sich von der cristenheit
0,1341 Sie hetten in richem showe
0,1342 die velt tal vn- owe
0,1343 Mit getzelden tveren wite bidact
0,1344 vil banyr hohe den obe gestact
0,1345 Dirre venvs die gotin
0,1346 het gesniten in die sin
0,1347 Chostpere vn- riche gnvc
0,1348 d' and' tzu der er libe truc
0,1349 Ein wunnic vrowenbilde
0,1350 d' tzeichen waren ouch ir shilde
0,1351 Dirre marten des strites got
0,1352 als in ir vnsin daz gebot
0,1353 Iener iovem der ander jvpitern
0,1354 als di sie helfe solden wern
0,1355 Daz ich die rede kvrtze hie mite
0,1356 ir banyre vil von spehem snite
0,1357 Als si in der hetten irdacht
0,1358 waren da tzu lichte bracht
0,1359 Ouch nach den tyren wilde
0,1360 ouch den vogeln vf dem gevilde
0,1361 Salatines banyr da het
0,1362 iren got machmet
0,1363 Als er daz ouch wolde
0,1364 des bilde von golde
0,1365 Rich vn- kostlichen gnvc
0,1366 ein karrotshe hoe enpor iz truc
0,1367 Vf einen bovm v'smidet vast
0,1368 ouch nider wart des bovmes last
0,1369 Vf den karrotshen v'smit
0,1370 mit ysene starc da tzv gewit
0,1371 Ir got machmet der helfe in
0,1372 cristus sol siner cristen sin
0,1373 Ein ware helfe in ir not
0,1374 sie waren da durch sin gebot
0,1375 Groz was der sarrazine macht
0,1376 von vil busvnen lvten bracht
0,1377 Da was . tambur ir rotvmbel
0,1378 wurden vf geslagen . ir dones hel
0,1379 Irshalten da manic heidenish horn
0,1380 die edelen cristen wolgeborn
0,1381 Als daz was des besten rat
0,1382 mit sturme suchten sie di stat

0,1383 Taeglich mit starkem her
0,1384 die innern waren ouch wol tzu wer
0,1385 Gegen den sturmes herten
0,1386 die stat sie menlich werten
0,1387 Dort inne ouch hi vze not
0,1388 si liden beidersit ir tot
0,1389 Bleip da der werlichen vil
0,1390 iz geshach als ich vch sagen wil
0,1391 Wenne an die stat die cristen
0,1392 sturmeten vn- als daz wisten
0,1393 Vn- irfuren die sarrazin
0,1394 als in gebot daz salatin
0,1395 Mit craft qvamen sie bireit
0,1396 iagende vf die cristenheit
0,1397 Die vor der stat arbeiten sich
0,1398 hinderwart vn- snellich
0,1399 Sie taten grozen shaden in
0,1400 mit geschozze vn- karten wid' hin
0,1401 Da mit her lac sasalatin
0,1402 also vil d' cristenen sin
0,1403 V'terbet in der sturmenden shar
0,1404 taeglich die heiden suchten dar
0,1405 Daz sturmen mvsten sie nv lan
0,1406 ein and' werc tzu handen van
0,1407 Als daz sturmen was gilegen
0,1408 vn- sie hetten des v'phlegen
0,1409 Nu wolden die heiden ouch stille sin
0,1410 nvr bi vieren oder bi drin
0,1411 Die warte menlich bisvchte die
0,1412 vf einem rucke der shiet sie
0,1413 Eines berges der was nicht hoch
0,1414 doch er mit hohe vber tzoch
0,1415 Der cristen vn- der heiden heer
0,1416 von dem gebirge biz an daz mer
0,1417 Den heiden ouch glich die hute
0,1418 suchten in vollem mvte
0,1419 Die werden turringe
0,1420 ich meine die dvringe
0,1421 Ane daz iz nicht irgie
0,1422 die wartlvte einander sich suchten sie
0,1423 Mit tyost die menlich wart gefrvmet
0,1424 ir starken sper entzwei gedrumet
0,1425 Von ir ellen so die tyost geschach
0,1426 daz man wol d' spere crach
0,1427 Horte in den heren beiden
0,1428 d' cristen vn- der heiden
0,1429 Die cristen tzu gote wis
0,1430 die heiden durch der werlde pris

0,1431 Vf der warte manige tzeit
0,1432 manigen werlichen strit
0,1433 Sie hetten des nimmer tac gebrach
0,1434 den heiden da doch we geschach
0,1435 Von den cristen die sie da valten
0,1436 vn- sie gote bihalten
0,1437 Wolden daz lob mit wurde craft
0,1438 an der salatinen ritterschaft
0,1439 Die von den duringen vf der warte
0,1440 wurden giletzet harte
0,1441 Gevangen v'wunt etslich irslagen
0,1442 die wolde mit tyost ein heiden clagen
0,1443 Getziret nach grozer werdicheit
0,1444 menlich er vf die warte reit
0,1445 D' heiden was ein hoher fral
0,1446 manic werder emmaral
0,1447 Was im tzu dienste mit im dar
0,1448 kvmen menlichen gar
0,1449 Die hiz er mit gemache sin
0,1450 alleine reit der sarrazin
0,1451 Als er gerte d' tyost
0,1452 d' grave wol torste tragen kost
0,1453 Daz man an sinem giverte sach
0,1454 siner wapen obedach
0,1455 Was ein samit tiewer von svntin bracht
0,1456 getziret nach w'diclicher acht
0,1457 Mit goltborten reine
0,1458 dar vf gevwieret gesteine
0,1459 Durchsichtic tiew' lichtgevar
0,1460 dar abe sie irglesten clar
0,1461 So daz man sich in in besach
0,1462 des selben truc sin oers ein dach
0,1463 Daz was creftic vn- starc
0,1464 sin shilt ouch lichten shin nicht barc
0,1465 Dar vf ein vrowenbilde lac
0,1466 nach der die sin mit liebe phlac
0,1467 Sin helm getziret reine
0,1468 mit manigem lichten steine
0,1469 Sin tzimir dar obe riche
0,1470 ez furte der manliche
0,1471 In siner hant von ror ein sper
0,1472 starc . tzu bracht nach siner ger
0,1473 Vor bi dem ysene ein cleiner vane
0,1474 nach dem shilde daz bilde dar ane
0,1475 Getziret wunnecliche
0,1476 nach dem vn- er was riche
0,1477 So reit in wurde do der fral
0,1478 in marcte ein herre d' sich des hal

0,1479 Daz er dem heiden bigegenen wolt
0,1480 von pleyen d' grave lutolt
0,1481 Heimilich er sich birichte tzu
0,1482 sin oers was im ouch kvmen nv
0,1483 Snel vn- starc so was daz
0,1484 in cristes namen dar vf er saz
0,1485 Er gahete da er den heiden sach
0,1486 daz heer gimeine im warte nach
0,1487 Siner kvnft d' heiden werde
0,1488 als ein helt er der bigerde
0,1489 Lutolt ouch als ein man irwegen
0,1490 dem heiden staphte engegen
0,1491 Ich sage als ich z habe v'nvmen
0,1492 do sie einand' waren kvmen
0,1493 So nahen vn- si des duchte tzit
0,1494 als man tzu r tyost ersprengens phlit
0,1495 Die graven beide wolgeborn
0,1496 die oers sie namen vf die sporn
0,1497 Mit craft sie die ersprancten
0,1498 ir sper tzu rechte sie sancten
0,1499 Itwed' gewinnes sich v'sach
0,1500 lutolt sin sper da brach
0,1501 Vf dem tuewern sarrazine
0,1502 d' menlich ouch daz sine
0,1503 V'tet als er des gerte
0,1504 Sie bisazen beide . tzu dem swerte
0,1505 Greif d' heiden menlich
0,1506 grave lutolt mvste wern sich
0,1507 Der ouch menlichen nv
0,1508 starke gap dem heiden tzu
0,1509 Der vf in slege vngetzalt
0,1510 sluc . die im gar sure galt
0,1511 Lutolt . des criehe was da so
0,1512 "pleyen ." ouch ofte "babilo"
0,1513 Der heiden menlichen rif
0,1514 vn- doch mit maniger wunden tief
0,1515 Als er ein menlich herze truc
0,1516 den sig lutolt im abe sluc
0,1517 Mit grozer not im daz geschach
0,1518 daz im da sicherheit v'iach
0,1519 Der menliche sarrazin
0,1520 vng'ne wolde er toten in
0,1521 Lutolt durch sine manheit
0,1522 gevangen d' heiden mit im reit
0,1523 In daz her des waren fro
0,1524 die cristen . d' grave lutolt do
0,1525 Sinem gaste shuf gemacht
0,1526 den wuentsegen man im sprach

0,1527 Ein artz gewan er ime
0,1528 nicht von mir selben ich iz nime
0,1529 Svnd' als ich z v'nvmen han
0,1530 bin des von duringen h'man
0,1531 D' lantgrave was ouch geriten
0,1532 vf die warte vn- het gestriten
0,1533 Mit einem w'den sarrazin
0,1534 den bracht ouch er gevangen in
0,1535 Daz Her . als er nach prise ranc
0,1536 des sagten im gar die w'den danc
0,1537 Diz irtzvrnte salatinen
0,1538 vn- gar die sarrazinen
0,1539 Waz so ringe geriten was
0,1540 mit bogen snel vz er die laz
0,1541 Gesvndert von der fursten her
0,1542 tvsent die waren vn- noch mer
0,1543 Als er daz het giheizen sie
0,1544 alle tage ranten die
0,1545 Vor der cristen her sneller vart
0,1546 vz ir starken bogen hart
0,1547 Manigen phil sie santen in
0,1548 vn- iagten wid' fluchtig hin
0,1549 Diz was vnlidebere
0,1550 dem volke vn- swere
0,1551 Vn- almeistic den die giengen
0,1552 Sie waren die m' enphiengen
0,1553 An ir legere die geshoz
0,1554 daz gimeine volc ouch des v'droz
0,1555 Durch gebrechen manigen den sie liden
0,1556 vn- die fursten nicht en striten
0,1557 Den sie also sagten wie
0,1558 nicht also da ligen sie
0,1559 Wolten striten vn- daz nicht sparn
0,1560 od' wider tzu lande varn
0,1561 Vmme sust sie liden not
0,1562 sie weren kvmen dar durch got
0,1563 Durch den sie wolden wagen sich
0,1564 were iz nicht wol bihegelych
0,1565 Den besten als die da weren doch
0,1566 waz des si wolden dannoch
0,1567 Entwed' striten oder varn
0,1568 vn- daz nicht lang' sparn
0,1569 Die besten rieten in da . wie
0,1570 ane sie nicht solden striten . sie
0,1571 Hetten s ouch imm' shande
0,1572 tzogten sie wider tzu lande
0,1573 Ouch striten sie vn- v'lurn
0,1574 den sig . des sie groz laster kvrn

0,1575 Des mvste shaden vn- leit
0,1576 liden die cristenheit
0,1577 // Nach gimeiner rede do
0,1578 was ir antwort also
0,1579 “Vns ist ein ein erlicher tot
0,1580 nvtz’ dan daz wir liden not
0,1581 Vn- an dem libe also v’wesen
0,1582 w’ mochte d’ noete lange ginesen
0,1583 Waz so vns nv da geschiht
0,1584 wir en flihen v’names von strite nicht
0,1585 Noch wir wollen des v’tzagen
0,1586 ob wir da werden gar irslagen
0,1587 Erlich an der marther not
0,1588 den sig biheldet vns der tot
0,1589 Ob wir n in gotes ere irholn
0,1590 wir wollen in williclichen doln”
0,1591 Veste sie waren des willen
0,1592 do sie des nicht mochten gestillen
0,1593 Die rede hilden wider si
0,1594 an den kvnig daz brachten di
0,1595 Der bisante die spitalere
0,1596 vn- ouch die tempelere
0,1597 Die besten als er die hate
0,1598 vn- wart mit den tzu rate
0,1599 Waz man tvn mochte
0,1600 vn- im tzu welene tochte
0,1601 Nv wart der rat vf getzocht
0,1602 vn- gesetz an d’ duringe vogt
0,1603 Der rit menlich dar tzu
0,1604 er sprach “so daz volc nv
0,1605 Tzu strite gantzen willen hat
0,1606 so ist ouch gantzer daz min rat
0,1607 Daz wir ouch menlich grifen tzu
0,1608 vn- vns vf strit birichten nv
0,1609 In dem namen d’ hohen trinitat
0,1610 vn- in des ere der vns hie hat
0,1611 Tzusamne bracht nv lat daz sin
0,1612 ist sterker vns her Salatin
0,1613 Vn- ist der sinen vor vns me
0,1614 so ist daz doch gishehen e
0,1615 Daz ein cleinez her mit craft
0,1616 mit gotes helfe sigehaft
0,1617 Wart . an der tobenden heidenshaft
0,1618 vn- an ir grozen ritterschaft
0,1619 Gedeon vf libes tzer
0,1620 driv hvndert er brachte tzu wer
0,1621 Gegen vil tusenden den doch er
0,1622 an gesigete nach siner ger

0,1623 Vn- sluc tot almeistic die
0,1624 daz mac ouch got vns geben hie
0,1625 D' vns v'names nicht en lat"
0,1626 in gevil wol des herren rat
0,1627 Mit Salatine der gegen in lac
0,1628 sie namen in einen strites tac
0,1629 Der bireit des wolde sin
0,1630 vf den tac was fride tzuwissen in
0,1631 die cristen des kvme irbeiten
0,1632 vf strit sie sich bireiten
0,1633 Ouch was diz des lantgraven rat
0,1634 man solde lazen vor der stat
0,1635 Luete die ane vechten die
0,1636 vn- tagelichen mveten sie
0,1637 Da wart geshicket tzu daz her
0,1638 daz da lac an dem mer
0,1639 Vn- noch als ich vch sagen wil
0,1640 des volkes tzu fuze was da vil
0,1641 Daz truc da manig' hande wer
0,1642 sie wurden giteilt ieclichem her
0,1643 Gar ebene vn- ordenlich
0,1644 als man sprichet gar gelich
0,1645 In was daz also mite getan
0,1646 vor den ritenden sie solden gan
0,1647 Wenne so des qveme die tzit
0,1648 sie solden heben erst den strit
0,1649 Des waren die fuzgengel fro
0,1650 dar vf birichten sie sich do
0,1651 Tzu dem kvnige die franzoysere
0,1652 vn- gar die lantpartere
0,1653 Als sie da waren gimeinlich
0,1654 Sie hilden vn- shicten sich
0,1655 Ir was vil iz wolde so
0,1656 wol . d' kvnig gwido
0,1657 So hilden tzu dem lantgraven sich
0,1658 die dutshen fro vn- williclich
0,1659 D' hohe meist' von sente iohanne
0,1660 mit manigem bigebenen manne
0,1661 Als er die het mit im do
0,1662 d' meist' von dem templo
0,1663 Mit sinen brudern frolich
0,1664 vnd' sin banyr ouch schicten sich
0,1665 Die brud' als die des gerden
0,1666 von dem dutshen huse . der werden
0,1667 Frevte d' edele furste sich
0,1668 von heldervngen heinrich
0,1669 Der was ein starc menlicher man
0,1670 den gevil die banir an

0,1671 Die er furen solde
0,1672 als d' lantgrave daz wolde
0,1673 Die heinrich ritterliche
0,1674 furte vn- menliche
0,1675 Vf hohes prises biiac
0,1676 in was nv chvmen strites tac
0,1677 Iz was noch des tages frv
0,1678 der banir was geschicket tzv
0,1679 Als er selbe des bigerde
0,1680 von gelre der werde
0,1681 Als im ie libte werdicheit
0,1682 d' von aldenburc mit im da reit
0,1683 Des kvnft biclagete da manic turc
0,1684 da reit grave albrecht von popenburc
0,1685 Von ride wityge der vogt
0,1686 noch der banyr bi tzogt
0,1687 Von arnstein her walther
0,1688 vn- and're w'den graven mer
0,1689 Ouch der lantgrave herman
0,1690 vil frien erliche dienstman
0,1691 Vf strit frech gar gemvt
0,1692 die banyr veste was bihvt
0,1693 Von manigem ritt'e wolgeborn
0,1694 Ludewig hilt die spitze vorn
0,1695 Ouch die stritherten leyen
0,1696 der von moseburc vn- der von pleyen
0,1697 Grave lutolt vn- grave Cvnrat
0,1698 sie waren von ritterlicher tat
0,1699 Als si z biwisten an dem tage
0,1700 ir qvam manic sarrazin tzu clage
0,1701 Friderich von bichlingen
0,1702 d' edele von lingen
0,1703 Grave friderich so hiz ouch d'
0,1704 ein menlich herre gar was er
0,1705 Vest gemvt vf strites werc
0,1706 d' wolgeborne von hennenberc
0,1707 Grave poppe er reit ouch da
0,1708 tzu dem het sich gedrenget na
0,1709 Grave cvnrat sin brud' friderich
0,1710 von dornburc getziret ritterlich
0,1711 Sie waren kvmen vn- gar
0,1712 irwegenes mvtes dar
0,1713 Von meydeburc grave burchart
0,1714 vn- sin bruder gebehart
0,1715 Von kevernb'c grave Gvnth' .
0,1716 da reit ouch vf der viende tzer
0,1717 Ein w'der grave menlich
0,1718 von aventberc her friderich

0,1719 Ouch grave friderich von bergelin
0,1720 bi dem lantgraven gewesen sin
0,1721 Herren von frier willekur
0,1722 als sie des tages mit im fur
0,1723 Der banyr wolden striten
0,1724 noch sach man da bi im riten
0,1725 Manigen werden ritter gut
0,1726 vf strit vesten gar gemvt
0,1727 Vor der banire . Si trugen haz
0,1728 der heyden diet als i in daz
0,1729 Des tages da biwisten
0,1730 an in sich hohe pristen
0,1731 Der lantgrave im libe sach an in
0,1732 fro wolt er der werden sin
0,1733 Als er wol mochte . wan alle die
0,1734 er bi im da sach . irwelte sie
0,1735 Ritte' waren veste gar
0,1736 vf strit menlich birichtet dar
0,1737 Noch waren da d' w'den vil
0,1738 die ich mit namen nicht setzen wil
0,1739 Daz ich die rede kurtze so
0,1740 hinden nach der banyr do
0,1741 Als sie tzu strite waren wis
0,1742 der wolgemvte marchis
0,1743 Von paden der h're h'man
0,1744 er het da manigen werden man
0,1745 Da reit mit werlicher hant
0,1746 florentius von hollant
0,1747 Sin bruder otto von pevtheim
0,1748 d' grave hvg von wertheim
0,1749 Von meran herzoge bertolt
0,1750 d' da hohen pris irholt
0,1751 An den vienden die er valte
0,1752 grave bertolt von rabenswalde
0,1753 Mit den sinen er ouch da reit
0,1754 gar in grozer werdicheit
0,1755 In heldes gebaren
0,1756 die von swartzburc da waren
0,1757 Mit einer erlichen rote
0,1758 als si da wolden dienen gote
0,1759 Grave Gvnther vn- heinrich
0,1760 sines wesens da nicht shamte sich
0,1761 Von blankenberc der grave wert
0,1762 als er d' heiden shaden gert
0,1763 So was er vestgemvter gar
0,1764 ein werlich helfe der shar
0,1765 Waz so herren . rittere . man
0,1766 gar die bishofe mochten han

0,1767 Die waren als ich vch sage nv
0,1768 geordent disen herren tzu
0,1769 Ouch von dem spitale d' hohemeist'
0,1770 den sarrazinen leiste er
0,1771 Des tages waz er in vor gehiz
0,1772 doch was da cleine ir geniz
0,1773 Die temployse waren ouch da
0,1774 den hetten sich tzu geshicket na
0,1775 Von dem dutshen hvse die herren
0,1776 vf ein ewigez werren
0,1777 Daz sie mit werlicher craft
0,1778 frvmten da der heidenschaft
0,1779 Ich meine d' bittern helle ser
0,1780 in al des lantgraven her
0,1781 So wart da fvnden nie dihein man
0,1782 er n het iz da gerne baz getan
0,1783 Der kvnig vn- die franzoyse
0,1784 vn- etliche der burgvndoyse
0,1785 Vil was da d' lamparten
0,1786 die vf den kvnic gewarten
0,1787 Ein creftic her furte do
0,1788 vf strit kvnig gwydo
0,1789 Ouch wol ordenlich geshart
0,1790 sin banyr ritterlich biwart
0,1791 Sie staphten siticliche
0,1792 gegen den vienden . doch menliche
0,1793 Sie sahen in richem schine
0,1794 ouch gegen in die sarrazine
0,1795 Kvmen als in nicht were gach
0,1796 waz von t'ramere sprach
0,1797 Her wolfram wie wunnecliche
0,1798 wi er getziret riche
0,1799 Gegen wilhalme vb' mer
0,1800 brachte ein w'lichez her
0,1801 Also brachte in grozer wirde
0,1802 vnd' kostlicher tzirde
0,1803 Gegen den cristen hie salatin
0,1804 manigen menlichen sarrazin
0,1805 Tzu schaden vn- tzu leide
0,1806 waz walt anger heide
0,1807 Die geblvmeten velt licht owe
0,1808 vor brachten tzu wunnenshowe
0,1809 Varwe tzu werdem shine gar
0,1810 vorbaz qvamen sie geflorirt dar
0,1811 Nach richer koste milde
0,1812 vf helmen vn- vf shilde
0,1813 Ir kovertuer ir wapencleit
0,1814 nach volkvmener richeit

0,1815 Sie quamen da alle werdiclich
0,1816 in tzuwo shar sie hetten sich
0,1817 Geteilt daz wolde salatin
0,1818 tzu strite gegen kvnig gwyden . sin
0,1819 Er het ein creftigez her
0,1820 doch die and' shar het volkes mer
0,1821 Als der soldan daz wolde
0,1822 die mit den dutshen striten solde
0,1823 Hovptman was der selben shar
0,1824 ein furste vestgemvter gar
0,1825 Er was salatines mag
0,1826 er torste vf prises biiac
0,1827 Wa man solde striten
0,1828 wol hvrticlichen riten
0,1829 Er selbe ritterlichen getziret
0,1830 als was ouch gefloriret
0,1831 Garlich sin her
0,1832 wol birichtet tzu wer
0,1833 Als er ouch milteclichen gap
0,1834 Suntin vn- hallap
0,1835 Noch vil burge lant vn- riche stete
0,1836 d' herre im tzu dienste hete
0,1837 Geheizen was er levi
0,1838 im riten noch and' fursten bi
0,1839 Der ich vch nicht genennen kan
0,1840 wol mochten sorge vf sie han
0,1841 Die in da qvamen engegen
0,1842 vn- mit in strites solden phlegen
0,1843 Die doch fro gedingen
0,1844 hetten vf gut gelingen
0,1845 So man z vch gantz sagen mvz
0,1846 waz des volkes tzu fuz
0,1847 Doch menlich vn- werhaft
0,1848 was dem lantgraven tzu geschaft
0,1849 Daz shicte er bi site
0,1850 vz an die wite
0,1851 Als im daz sere frvmelich
0,1852 sit wart vn- nvtzlich
0,1853 Er sprach in trostlichen tzu
0,1854 "o . ir min vil lieben brude' nv
0,1855 Habt trost tzu gote ein erlich shar
0,1856 ir habt nv nemt des ebene war
0,1857 Durch die liebe d' meyde svns
0,1858 wenne so sich vf strit mit vns
0,1859 Bechvmmern die sarrazin
0,1860 so sult ir hindene an in sin
0,1861 Durch got ane v'drizen
0,1862 mit helbarten vn- mit spizen

0,1863 Ir varet der orse vndir in
0,1864 vn- ouch wa sie vch tzu rame sin
0,1865 Shonet ir nicht wande sie vient
0,1866 garlich vnser selden sint”
0,1867 Dem herren sagten sie also
0,1868 sie wolden frolich striten do
0,1869 Durch ir sele heil tzu eren gote
0,1870 ouch da sin nach sinem gebote
0,1871 Der herre in neic vn- sagte in
0,1872 “gewis sul wir des siges sin”
0,1873 Tzu al den herren er sprach
0,1874 waz er der bi im sach
0,1875 “vch hat der ware hymelgot
0,1876 her geladen vn- sin gebot
0,1877 Des gelovbe vn- sin almechticheit
0,1878 wil huete ew’ werdicheit
0,1879 Mer hohen vn- vf tzihen die
0,1880 man hat vch also funden ie
0,1881 Wie ir mit w’licher hant
0,1882 welt wern lute vn- lant
0,1883 Die nicht en erben . sie sin ein lehen
0,1884 vch von gote . ir welt sie vehen
0,1885 Starke vn- tzu vienden han
0,1886 die vch bitrubten dar an
0,1887 Ia hebe wir hie dihein w’ndez wesen
0,1888 vf ein ewigez ginesen
0,1889 Stritet hute froliche
0,1890 vm ewer erbe daz hymelriche”
0,1891 Als er den trost in gegap
0,1892 “des helf vns daz heilige grap”
0,1893 Nach dem kyrieleyson
0,1894 si svngen gote den svzen don
0,1895 Die walhe ouch mit dem kvnige fro
0,1896 iren leisen svngen . do
0,1897 Da Mit sie alle tzugen ir swert
0,1898 in beiden hern die cristen wert
0,1899 Die viende in starc tzvgen tzv
0,1900 einand’ si waren so nahen nv
0,1901 Die cristen ouch die sarrazin
0,1902 diz mochte and’s nicht gesin
0,1903 Der strit en mvste samnen sich
0,1904 tzwissen den sharn menlich
0,1905 Die vor geschicket waren
0,1906 in vientlichen gebaren
0,1907 Einand’ sich bisvchten die
0,1908 ir sper mit craft v’taten sie
0,1909 Des die heiden nicht wol genvzzen
0,1910 ir viel vil ouch da v’schuzzen

0,1911 Die schvtzen menlichen gar
0,1912 ire swert sie fvrten bar
0,1913 Als si den heiden trugen haz
0,1914 wol tet dem lantgraven daz
0,1915 Mit der spitze er volgete nach
0,1916 die shutzen er von den vienden brach
0,1917 Er sprach “ir habt iz gut getan
0,1918 ir sult vch in die rote han”
0,1919 Als er in sagte sie taten daz
0,1920 mit vollem hvrte vorbaz
0,1921 An die viende der furste dructe
0,1922 die banir mit craft nach ructe
0,1923 Vn- gar die nach der waren
0,1924 mit herten slegen swaren
0,1925 Vn- mit werlicher hant
0,1926 von den cristen an gerant
0,1927 Vn- bichvmmert da sin
0,1928 die strit gernden sarrazin
0,1929 Die mit sweren slegen herten
0,1930 menlichen werten
0,1931 Als helde ir pris ouch ir leben
0,1932 in was tzu werke da gegeben
0,1933 Tzu beiden teiln als iz in lac
0,1934 nyman da der mvze phlac
0,1935 Die cristen als ein mver tzu wer
0,1936 da hilden . vf . si . der heiden her
0,1937 Dranc gar crefticliche
0,1938 daz wider dructen herticliche
0,1939 Der lantgrave mit craft
0,1940 mit im die werde rittershaft
0,1941 Nyman mac mir gesagen daz
0,1942 ob iz ie geteten baz
0,1943 Ie herren vf der erden
0,1944 als iz gar die werden
0,1945 In strite da taten
0,1946 die sich dar gesamnet haben
0,1947 In all’ wise ritterlich
0,1948 vor den vienden sie vf hilden sich
0,1949 In der heiden flut v’tzwicket
0,1950 tzusamne mit in gericket
0,1951 Vn- bitwngen in einen kopil
0,1952 von beiden hern die frechen tropil
0,1953 Mit starken slegen bitwuongelich
0,1954 vn- also starc sie drvngen sich
0,1955 Er mvste gar cleinefuge sin
0,1956 d’ sich da solde twingen in
0,1957 Also stvnt der strit in stete
0,1958 als vor den fuzgenden hete

0,1959 Der lantgrave gesprochen tzu
0,1960 also waren hinden nv
0,1961 An die viende kvmen die
0,1962 oers vn- man slugen sie
0,1963 E si ir wurden gewar
0,1964 ein michil vach der viende shar
0,1965 Hetten sie tzu fuze bracht
0,1966 ouch tot gevalt . mit ir macht
0,1967 Slugen vil der heyden die
0,1968 ouch wurden sere geletzet sie
0,1969 Idoch der viende vil me
0,1970 oersen ouch den luten we
0,1971 Sie taten mit hertem strite gar
0,1972 der lantgrave der heiden shar
0,1973 Ritterlichen durch brach
0,1974 mit grozer not iz doch geschach
0,1975 Die edelen cristen wolgemvt
0,1976 ir aller harnash d' was gut
0,1977 Des da wol genvzzen die
0,1978 menlichen kecke striten sie
0,1979 Wer des lantgraven irbeite
0,1980 den tot het er bireite
0,1981 Die sarrazine doch herten
0,1982 noch an dem strite vaste sie werten
0,1983 Sich . si en wolden fliehen nicht
0,1984 rich ir tzmirde von steinen licht
0,1985 Da richten acker vn- furch
0,1986 bineben vz vn- wider durch
0,1987 Der cristen banyr fur mit craft
0,1988 ludewig durchreit die heidenschaft
0,1989 Mit gewalt vn- in vnsiten
0,1990 biz vf die iene die noch striten
0,1991 Mit der fuzgenden shar
0,1992 als der der herre wart gewar
0,1993 Er troste sie vn- sprach tzu in
0,1994 "ir wert vch liben bruder min
0,1995 Ich gelobt vch den sig den habt ir
0,1996 nv macht vch rvem her tzu mir"
0,1997 Als er in het also gesaget
0,1998 frechgemvt vn- vnv'tzaget
0,1999 Mit ir wer die sie trugen
0,2000 sie stachen vn- slugen
0,2001 An die w'lichen heyden nv
0,2002 den gap ouch starc der furste tzv
0,2003 Der sinen tzu fuze was vil irslagen
0,2004 doch mer . der heiden die nv tzagen
0,2005 Bigonden als sie des die not
0,2006 twanc vn- der herte tot

0,2007 Waz ir da was noch geriten
0,2008 des herren die da nicht erbiten
0,2009 Die flucht v'howen sere doch
0,2010 ir vil gaben dar . da noch
0,2011 Levi streit ir hovpman
0,2012 den d' lantgrave herman
0,2013 Noch starc mit strite mvete da
0,2014 dem lantgraven was ouch ga
0,2015 Als er den flihenden iagete nach
0,2016 volgen man dem fursten sach
0,2017 Die edelen graven vestgemvt
0,2018 vn- manigen werden ritter gut
0,2019 Ouch die fuzgenden man
0,2020 sie hetten grozen mort bigan
0,2021 An orsen ouch an den heiden hie
0,2022 nach in gestrevt lagen die
0,2023 Vf dem velde dicke
0,2024 in iamerigem blicke
0,2025 // Wol marcte daz der furste
0,2026 wie in getvrste
0,2027 Nach d' viende banyr streit
0,2028 sin brvder in voller herticheit
0,2029 Als er wolde ircrigen die
0,2030 vn- den heiden tzu laste' sie
0,2031 Tzu der erden bringen
0,2032 den sig also irringen
0,2033 Mit im gar die werden
0,2034 glich des bigerden
0,2035 Alsus d' margrave von paden
0,2036 tet den vienden grozen shaden
0,2037 Dem gelich an allez wanken
0,2038 grave poppe mit sinen franken
0,2039 Ich meine den herren von hennenberc
0,2040 er worchte da menliche werc
0,2041 Florentius von hollant
0,2042 da mit werlicher hant
0,2043 Sluc vil der sarratzine tot
0,2044 sin bruder tet in die selbe not
0,2045 Grave otto von pevtheim
0,2046 daz selbe tet her hvg von w'theim
0,2047 Die cristen gimeinliche
0,2048 die striten menliche
0,2049 Ouch wolden die heiden
0,2050 vngerne von prise sheiden
0,2051 Des bleip ir da maniger tot
0,2052 die cristen ouch von in liden not
0,2053 Sie slugen dise man sluc ouch sie
0,2054 nv sach der werde ludewig wie

0,2055 Beidersit in manheit siten
0,2056 die cristen ouch die heiden striten
0,2057 Mit den die im lagen tzu
0,2058 in vollem hvrte dructe er nv
0,2059 Vf der heiden ritterschaft
0,2060 die er starc mit voller craft
0,2061 Biz an ir banyere durchreit
0,2062 dar gegen ouch der bruder streit
0,2063 Die herren mit vollem strite nv
0,2064 gaben menlichen tzu
0,2065 Den vienden ludewig manigen fral
0,2066 vn- manigen tuuern emaral
0,2067 Durch licht tzimirde die er truc
0,2068 von dem oerse da nider sluc
0,2069 Von pleyen grave lutolt
0,2070 daz er den vienden was abholt
0,2071 Menlich er daz biwiste in
0,2072 manic werlicher sarrazin
0,2073 Lac da tot von siner craft
0,2074 qvamen sie dar durch amorshaft
0,2075 Oder durch minnegeldes lon
0,2076 da shiden sie die cristen von
0,2077 Grave Cvnrat von moseburc
0,2078 sluc da manigen frechen turc
0,2079 Tot tzu der erden
0,2080 also taten ouch die werden
0,2081 Von swarzburc menlich die striten
0,2082 not die viende von in liten
0,2083 Waz da der w'den waren
0,2084 gimeine sie wolden varen
0,2085 Der sarrazine als sie des not
0,2086 twanc vn- ir manheit in gebot
0,2087 Sie wolden glich gute ritte' sin
0,2088 des engulden sere die sarrazin
0,2089 An ir banyr vogt wityge
0,2090 gegen den vienden der vnsitige
0,2091 Was nv kvmen dem menlich nach
0,2092 lantgrave h'man mit al d' rote brach
0,2093 Ouch d' hertzoze von meran
0,2094 vil graven vn- die bigebenen man
0,2095 Vast vf die banyr drvngen nv
0,2096 Ludewig ouch and'sit in tzu
0,2097 Starke grave burchart
0,2098 bi im sin bruder gebehart
0,2099 Als rechte helde menliche gar
0,2100 mit vollem hurte dructen dar
0,2101 Ich wil die rede kurtz vch sagen
0,2102 der sie furte er wart irslagen

0,2103 Doch ein w'lich' ritter hart
0,2104 die banyr nider gebrachen wart
0,2105 Vntrost daz den heiden gap
0,2106 "nv helf vns daz heilige grap"
0,2107 Die edelen cristen svngen do
0,2108 ouch ir criege sie rifen fro
0,2109 Die heiden wichen hinder sich
0,2110 vn- noch dannoch werlich
0,2111 Alda sie woesten salatin
0,2112 mit strite ludewig volgete in
0,2113 Nach sinem willen iz im gie
0,2114 nv qvamen im die mere wie
0,2115 Gwido vor salatinen
0,2116 fure fluchtic vn- die sinen
0,2117 Ouch mit im die frantzoyser
0,2118 vn- gar die lampartere
0,2119 Vn- wie d' soldan von babilo
0,2120 fluchtic si iagete do
0,2121 Waz der cristenlichen kint
0,2122 tzu fuze da gewesen sint
0,2123 Den walhen geordent tzu
0,2124 die lizen sie ane helfe nv
0,2125 Die wurden an dem nachiagen
0,2126 sere v'wunt vn- irslagen
0,2127 Ir qvam der drizigiste nicht hin
0,2128 ouch wart vil der sarrazin
0,2129 Von den genden tot geslagen
0,2130 die mvsten lazen daz nachiagen
0,2131 Het gwido also herticlich
0,2132 gewert mit den walhen sich
0,2133 Als die tzu fuze da taten
0,2134 die si doch tzu helfe haten
0,2135 So en mochte vor in salatin
0,2136 noch die sinen nicht bliben sin
0,2137 Als levi vor dem lantgraven tet
0,2138 vf die flucht sich der nv het
0,2139 Gericht mit den sinen
0,2140 noch den sarrazinen
0,2141 Der furste menlichen iagete na
0,2142 tzu im der hohemeister da
0,2143 Rante er sprach im also tzu
0,2144 "herre dem oerse enthaldet nv
0,2145 En iaget nicht me iz ist gvt
0,2146 alzu sere ir mvden tvt
0,2147 Die oers daz volc hie beitet ir
0,2148 biz daz tzusamne kvmen wir
0,2149 So fraget ir die herren waz
0,2150 in gevalle . vn- tv man daz

0,2151 Ir sehet wi der kvnic fluhet
0,2152 wi gar sich nach im tzuhet
0,2153 Salatin der soldan”
0,2154 d’ lantgrave sprach “daz sie getan”
0,2155 Er enhilt dem oerse vn- sprach also
0,2156 “daz der kvnig gwido
0,2157 Mit der flucht vnert die cristenheit
0,2158 daz ist mir gentzlichen leit
0,2159 Sprecht waz si daz beste nv
0,2160 des grife man endelichen tzv”
0,2161 Tzusamne sie waren chvmen do
0,2162 ir aller antwort stvnt also
0,2163 “allez daz an grifet ir
0,2164 des wellen herre helfen wir”
0,2165 Gar in betrvbten mvte
0,2166 der menliche da bi der gute
0,2167 Sprach . “dem kvnige mit craft
0,2168 der soldan mit der heidenschaft
0,2169 Menlich nach gevolget hat
0,2170 biz an der herberge stat
0,2171 Als ir wol sehet in viendes siten
0,2172 wirt daz von vns nicht widerriten
0,2173 Wirt der kvnic fluchtig vorbaz
0,2174 vn- bihelt dirre die herberge . daz
0,2175 Mvz vns ein ewic laster sin
0,2176 daz ist min rat wir tzihen da hin
0,2177 Als vns got hat gesament hie
0,2178 tzu helfe den vnsern waz ob sie
0,2179 Vnser chvmfte trosten sich
0,2180 vn- cheren wider menlich
0,2181 Gegen den vienden in den strit
0,2182 gevellet vch der rat . so ist des tzit
0,2183 Daz wir vns snelle machen dar
0,2184 nach vns si der fvzgenden shar
0,2185 Wande iz mac also geschehen
0,2186 So vns die iene cheren sehen
0,2187 Die vor vns nv fluchtig sin
0,2188 daz sie denken wir wichen in
0,2189 Vn- tzihen vns nach . den si tzu wer
0,2190 vn- wid’ tzu fvz gende daz her
0,2191 Den helfe min brud’ herman
0,2192 ouch min swager bertolt von meran
0,2193 Mit in der margrave von paden
0,2194 als er ouch gert der heiden shaden
0,2195 Mit den drin fursten iren man
0,2196 vn- waz si hie der werden han
0,2197 Waz der andern h’reu si
0,2198 den wil ich vor wesen bi”

0,2199 Gemeine si riefen do
0,2200 iz solde wesen also
0,2201 Vn- si wolden ane bitragen
0,2202 sich in gotes ere da wagen
0,2203 Fro mit der rede hin staphten si
0,2204 do sie sach cheren levi
0,2205 Er het ouch wid' gesamnet sich
0,2206 er dachte sie fluhē tzagelich
0,2207 Vn- wie der sig were sin
0,2208 er sprach "seht die cristen tzihen hin
0,2209 Den sig haben sie v'lorn"
0,2210 waz sie da heidenisher horn
0,2211 In ir her noch haben
0,2212 irshellen sie die taten
0,2213 Die busvnen tambur ir criehe
0,2214 sie bigonden starke schrien
0,2215 In hochvart als vor der furste sprach
0,2216 vf strit tzuken si im nach
0,2217 Also mvste daz gotes her
0,2218 sich da setzen tzu wer
0,2219 Vorn vn- ovch tzurucke
0,2220 mit craft poders drucke
0,2221 Als der furste in die lere gap
0,2222 "helfe vns daz heilige grap"
0,2223 Sie luter stimme svngen ho
0,2224 menlich vf die heiden so
0,2225 Der lantgrave quam geriten
0,2226 als die noch mit dem kvnige striten
0,2227 Waz si dem tzu leide taten
0,2228 vn- die sinen genotet haben
0,2229 Mit vollem strite manicvalt
0,2230 in der lantgrave nv daz galt
0,2231 Ouch mit im gar die werden
0,2232 als si des tzu gote gerden
0,2233 Er solt ir dienestes lonen in
0,2234 si sparten nicht die sarrazin
0,2235 Gaben e goltvarwen shin
0,2236 also si die tzugten in
0,2237 Ir shilde ir tzimir . ir harnash
0,2238 ir wapenleit der v'lash
0,2239 Von ir blute rotgevar
0,2240 die waren nv iameric gar
0,2241 Von ir blute biflozen
0,2242 vn- manig' wegen bigozzen
0,2243 Ia en wolden die edelen cristen
0,2244 nicht die heiden fristen
0,2245 Waren si der cristenheit gehaz
0,2246 nv galt in der furste daz

0,2247 Mit d' werlichen rittershaft
0,2248 sich werte ouch starc die heidenschaft
0,2249 Ir was vil . der soldan
0,2250 was selbe ein werlicher man
0,2251 Ia en wolde er selbe daz
0,2252 iz iman da tete vor in baz
0,2253 Als ein recht helt er streit
0,2254 mit dem graven er tzusamne reit
0,2255 Von arnstein d' ouch sich
0,2256 werte sin da menlich
0,2257 Sie taten beide einander not
0,2258 vnd' dem graven stach da tot
0,2259 Daz oers . der von babylo
0,2260 walth' tzu fuze sich mvste do
0,2261 Wern ob er wolde ginesen
0,2262 waz solt er tvn iz mvste wesen
0,2263 Swere iz gar dem herren lac
0,2264 er enphinc da manigen slac
0,2265 Sin gut harnash in nerte
0,2266 als ein helt er sich noch werte
0,2267 Ouch wart er vngefuge gar
0,2268 gehurt her vn- dar
0,2269 Da von im we gar geshach
0,2270 ein sin ritter in ersach
0,2271 Her alber von arnstete
0,2272 den er mit im bracht dar hete
0,2273 Getruwe ein helt irwegen gar
0,2274 er crigte tzu dem herren dar
0,2275 Tzu im d' ritt' w'de .
0,2276 irbeizte vf die erde
0,2277 Vor de- h'ren tzu der not
0,2278 er sich menlich da bot
0,2279 Vf sin oers doch brachte er in
0,2280 er wolt phant vor in sin
0,2281 Den herren hiz ab riten er
0,2282 sere tzuqvatschet so was der
0,2283 Von slegen wunder iz was
0,2284 daz der herre ie genas
0,2285 Da stvnt als ein helt alber
0,2286 wolgemvt was des er
0,2287 Daz er lebende hette hin
0,2288 abe bracht den herren sin
0,2289 Al stende er we den heiden tet
0,2290 d' lantgrave daz gesehen het
0,2291 Wie her alber vor den h'ren trat
0,2292 wi er im abe geholfen hat
0,2293 Wie er tzu fuze mit craft da streit
0,2294 im was sin v'terben leit

0,2295 Als er sich des lebens het
0,2296 irwegen . grozen mein tet
0,2297 Den heiden alber vn- vngemach
0,2298 d' lantgrave ouch vf sich dringen sach
0,2299 Einen der heidene hochgemvt
0,2300 ein oers creftic envollen gut
0,2301 Reit der stoltze babilon
0,2302 den sluc der furste da von
0,2303 Toten vf die erde
0,2304 daz oers bigreif d' w'de .
0,2305 Durch gar grozen gedranc .
0,2306 Mit gewalt gar ane d' heiden danc
0,2307 Als er im helfe gedachte
0,2308 dem ritter er daz brachte
0,2309 Vn- half dem snelle dar vf
0,2310 leit daz den sarrazinen shuf
0,2311 Wande ir der helt von arnstet
0,2312 diheine shone mer het
0,2313 Wer so im tzu rame qvam
0,2314 den tot von im gewis d' nam
0,2315 Im half der lantgrave bi tzit
0,2316 herte gar was der strit
0,2317 Ludewig truc den heiden niet
0,2318 hindene vorn vn- besit
0,2319 Mit craft ir rote er durch brach
0,2320 disen er sluc . ienem er stach
0,2321 Daz oers . er bracht ir vil d' nider
0,2322 die sich des mit nichte wider
0,2323 Mochten berichten noch me irholn
0,2324 sie en mvesten ein bitter sterben doln
0,2325 Iz en brachte d' dutshen diheiner dar
0,2326 an im tzageheit mit d' ein har
0,2327 Man mochte tzu widerwechsele wegen
0,2328 si hetten sich alle des irwegen
0,2329 Sie wolden in gote irsterben
0,2330 od' den sig irwerben
0,2331 An sinen vienden mit craft
0,2332 den soldan die starken heidenschaft
0,2333 Als er ein menlich h'tze truc .
0,2334 mit gewalt er tzurucke sluc .
0,2335 Der menliche Ludewig .
0,2336 von den h'bergen . ouch het den sig
0,2337 Lantgrave h'man vnv'tzaget
0,2338 an levi mit strite biiagt
0,2339 beid'sit sie fluhen nv
0,2340 an beden teilen in starke tzu
0,2341 Die cristen vn- vientlich satzten
0,2342 an der flucht si sere lazten

0,2343 Hie ludewig nach salatine
0,2344 dort herman der helfer sine
0,2345 Der sarrazine slugen vil
0,2346 hie mit ir strit ich lazen wil
0,2347 Iz wurde tzu lanc solt ich z vch sagen
0,2348 wie dirre vn- iener wurde irslagen
0,2349 Der cristen wart da vil gevalt
0,2350 da wider der heiden vngetzalt
0,2351 Lagen da manigen enden tot
0,2352 der sele tzu r helle liden not
0,2353 Der cristen sele tzu himele fro
0,2354 wesen als si z v'dienten do
0,2355 Des si dir immer mere
0,2356 Got herre lob vn- ere
0,2357 Der lantgrave het geiaget noch
0,2358 wen daz in des diz widertzoch
0,2359 Daz al den tac sie garlich
0,2360 die oers vn- ouch selben sich
0,2361 Hetten gemvt tzu sere
0,2362 daz twanc si der widerchere
0,2363 Daz selbe sin brud' h'man
0,2364 tet mit dem von meran
0,2365 Vn- mit dem margraven von paden .
0,2366 In beiden hern sie hetten shaden
0,2367 An den lueten genvmen
0,2368 diz mochte nicht anders tzv kvmen
0,2369 Gewin vn- v'lust gibt der strit
0,2370 iz mochte nv wesen tzit
0,2371 Ob sie icht haten daz sie sazen
0,2372 die herren vn- daz azen
0,2373 Sie fynden bireit cleinez maz
0,2374 shire was v'tzeret daz
0,2375 Den v'seret shuf man gemach
0,2376 ludewig in selbe tzu sach
0,2377 Er troste sie wol in daz tet
0,2378 ein suzgemvtez herze er het
0,2379 Dar als er ouch gebot
0,2380 die in strite waren tot
0,2381 Die wurden snelle vor nacht
0,2382 bi daz her tzusamne bracht
0,2383 Als sie in gotes ere getotet
0,2384 in ir blute durch in gerotet
0,2385 Die phapheit vigilie sanc da in
0,2386 die bishofe wolden selbe da sin
0,2387 Sie wurden mit eren biwacht
0,2388 in grozer andacht in wart gemacht
0,2389 Ein grube bi dem mer bisit
0,2390 noch tzu tief noch tzu wiet

0,2391 Von misne bishof mertin
0,2392 Gote tzu eren tzu troste in
0,2393 Sanc eine shone messe gar
0,2394 voller stimme vn- offenbar
0,2395 Von al der phafheit wart do
0,2396 daz ampet volbracht also
0,2397 Waz d' bishofe vn- der prister was
0,2398 ieclicher da eine messe las
0,2399 Dar nach mit grozen eren . die
0,2400 toten heilich bistatten sie
0,2401 Als der lantgrave die lere gap
0,2402 ein tifer grabe vmringet daz grap
0,2403 Als er daz wolde vn- shuf
0,2404 daz dihein vie gienge dar vf
0,2405 In tzu heile cristo tzu lobe
0,2406 ein cruzce hohe gericht dar obe
0,2407 Ovch hiz tzusamne salatin
0,2408 tragen die toten sarrazin
0,2409 In einem fride diz geshach
0,2410 vn- nvr durch daz man den sprach
0,2411 Daz vf den velden wa si wolden
0,2412 beid'sit die toten holden
0,2413 Als man vns von den heiden seit
0,2414 wie daz si ir gewonheit
0,2415 Wenne so daz sterben die
0,2416 wi daz ire frvnt v'burnen sie
0,2417 Dem selben tet do glich salatin
0,2418 alle die toten sarrazin
0,2419 Als si waren da irslagen
0,2420 hiz er manigen enden tragen
0,2421 Tzu hovfe vn- v'burnen die
0,2422 ir gewonheit in die haben sie
0,2423 Ir gelovben vn- ir leben
0,2424 den so ist daz wol eben
0,2425 Der lantgrave durch sin hofsheit
0,2426 mit den werden vz sinem her reit
0,2427 Tzu dem kvnige Gwiden er clagete
0,2428 in . ouch er im sagete
0,2429 "herre die wile vn- wir . mit
0,2430 Salatine sin gefrit
0,2431 Ob iz vch ist bihagelich
0,2432 iz dunket wol nvtze wesen mich
0,2433 Die wile man des die mvze habe
0,2434 daz ein itslich man sich vmme grabe
0,2435 Als wir hie gilegen sin
0,2436 daz nach dem fride salatin
0,2437 Vns in die herberge renne nicht
0,2438 des vornames vil geschiht

0,2439 Wa gegen einand' tzu wer
0,2440 die lute samnen sich mit her
0,2441 Er ist so gar irwegen ein man
0,2442 er sol iz chvme gelan
0,2443 Als ich habe sin riten
0,2444 gesehen . vn- sin striten
0,2445 So merke ich gantzlichen in
0,2446 volkvmen grozer manheit sin
0,2447 Er furt ouch gar herte rittershaft
0,2448 wir entsitzen billich ire craft
0,2449 Hvnde menige vellen tyr
0,2450 doch wellen vns ir weren wir”
0,2451 Der kvnig sprach dem fursten tzu
0,2452 “iz ist wol gut daz selbe man tv”
0,2453 Iz was ouch garlich
0,2454 den herren bihegelych
0,2455 Da greif menlich edele man
0,2456 die arbeit tursticlichen an
0,2457 Des wolde nyman sin v'haben
0,2458 er n wolde vz werfen oder graben
0,2459 Der furste der grave . die rede ist slecht
0,2460 der frie der ritter ouch der knecht
0,2461 Tief wiete graben snellich
0,2462 sie do tzuken vmme sich
0,2463 Dar nach werlich vf die
0,2464 starke tzvene flachten . sie
0,2465 Arbeiten tac vn- nacht
0,2466 biz daz sie hetten daz tzu bracht
0,2467 Von ir mastbovmn hoh enpor
0,2468 sie satzten bercfrit ob die tor
0,2469 Die wurden flizic gar biwacht
0,2470 sie hetten in legers da gedacht
0,2471 Die bishofe vor sunda daz sazten in
0,2472 vn- baten sie fro in gote sin
0,2473 Ir erbe solde sin der hymelhof
0,2474 Gotfrit der bishof
0,2475 Von wirzeburc mit voller lere
0,2476 in offenbarte die hymelere
0,2477 Vn- sagte mit suzer predigat
0,2478 also tet der bishof cvnrat
0,2479 Von regensburc ein heilic man
0,2480 er was . vn- lac den werden an
0,2481 Daz sie wolden wesen fro
0,2482 vn- 'lizen sich nicht v'drizen do
0,2483 Ouch waren ir lebens reine
0,2484 die bishofe gimeine
0,2485 Doch in manlichen getursten
0,2486 vn- in gote wise fursten

0,2487 Dem volke ein trost waren sie
0,2488 iz geschach ich sage vñ wie
0,2489 Wa man sich von der arbeit
0,2490 lat . vñ- gibt der mvzicheit
0,2491 Von sachen maniger hande
0,2492 wirt da manic ande
0,2493 Mit rede gerochen vñ- biricht
0,2494 der werdicheit diz fuget nicht
0,2495 Alhie ein gelichez dem geshach
0,2496 da was manic man der sprach
0,2497 Wie der markis von monverran
0,2498 Cvnrat het lesterlich getan
0,2499 So daz er in nicht helfe tet
0,2500 sie sprachen daz er genvmen het
0,2501 Dar vmme des soldanes golt
0,2502 daz er stille sitzen solt
0,2503 Waz so der was die sprachen diz
0,2504 der lantgrave sprach “sie lazen iz”
0,2505 Er sprach “iz stet vch vbel an
0,2506 vñ- ist nicht ritterlich getan
0,2507 Lat die rede iz fuget wol
0,2508 vf den marchis nyeman nich reden sol
0,2509 Wer weiz war vm iz ist geschehen
0,2510 daz er sitzt stille ich wil bisehen
0,2511 Ob ich in mvge bringen her
0,2512 ich hoffe er irfulle mine ger
0,2513 Ein menlich helt sines rates wis
0,2514 vf alle sache der marchis
0,2515 Ist . vñ- von ritterlicher tat
0,2516 daz er vil biwiset hat
0,2517 An sinen vienden da er streit
0,2518 hie mit ist sin werdicheit
0,2519 Nicht hin gilegeit ob er vns kvmet
0,2520 Als ich des hoffe wol vns daz frvmet
0,2521 Wir wollen sin wol getrostet sin”
0,2522 mit sinen brifen grvzte er in
0,2523 Dar an er vant geschriben so
0,2524 “Ewer salden bin ich fro
0,2525 Herre iz ist bisvnder
0,2526 ein vbergrozez wunder
0,2527 Vñ- seltsene mir
0,2528 als ich daz weiz an vch daz ir
0,2529 Ie bi manheit wesen woldet
0,2530 vñ- hohen wa ir soldet
0,2531 Ewer furstlichen pris
0,2532 gelovbet mir her marchis
0,2533 Wilhelm der werde ewer vater
0,2534 mit nichte daz v’lazen hat er

0,2535 Als er was an manheit veste
0,2536 ob er im so nahen weste
0,2537 Die gotes diener liden not
0,2538 ob er halt da holen den tot
0,2539 Oder shaden nemen solde
0,2540 wesen er da wolde
0,2541 Vn- sich da biwisen als ein man
0,2542 ouch erbit vch manheit von im an
0,2543 Sol die an vch wachsen abe
0,2544 daz ist mir leit vor war ich z habe
0,2545 Vnd ich in woeste so gar irwegen
0,2546 iz en het ouch wilhalm nicht v'legen
0,2547 Ewer bruder dem gnade got
0,2548 gelovbet mir wa ich vch woeste in not
0,2549 Als wir nv gegen den heiden sin
0,2550 ich qveme vch vngesvmet da hin
0,2551 Sit vns ein helfe ein dienst gote
0,2552 nach ewer werdicheite gebote
0,2553 Sit ir iemanne gehaz
0,2554 nicht rechet an ewerm prise daz
0,2555 Den nidert nicht ." als er gelas
0,2556 der marchis als im enpoten was
0,2557 In im selben iach er des san
0,2558 wie daz er hette missetan
0,2559 Er schreip dem lantgraven hin
0,2560 er wolde im tzv helfe sin
0,2561 Des was der tvgentliche fro
0,2562 er sagte iz gar den werden do
0,2563 Margrave Cvnrat nicht en svmte sich
0,2564 tzusamne gar ein werlich
0,2565 Her . er brachte ouch mit im dar
0,2566 qvam ritterlicher verte gar
0,2567 Der grave von monteral reynolt
0,2568 als er gote bezzern wolt
0,2569 Des er vor sich v'gaz
0,2570 an den heiden wolt er daz
0,2571 In strite rechen mit craft
0,2572 sie brachten werde ritterschaft
0,2573 Geoerset starc getziret rich
0,2574 sie leiten tzu dem lantgraven sich
0,2575 Der in groz' wurde sie
0,2576 vn- vollen frolich enphie
0,2577 An in erfur der wise daz
0,2578 war vm sie dem knige waren gehaz
0,2579 Daz binam er mit suzer rede in
0,2580 vn- leite daz aller dinge hin
0,2581 Nu wart des lang' nicht gebiten
0,2582 er schuf daz si tzusamne riten

0,2583 Einand' helfe gelobten . fro
0,2584 was ir der kvnic gwido
0,2585 Also was ouch gar daz gotes her
0,2586 in qvam nv chost vf dem mer
0,2587 Von crieche venedie riche gar
0,2588 von jeuve manigen enden dar
0,2589 So brachten riche kovfman die
0,2590 als dar an wolden gewinnen sie
0,2591 Der wart rich daz her biraten
0,2592 die tzwene die vor haten
0,2593 Gevangen langrave herman
0,2594 der starcfurstiger man
0,2595 Vn- grave lutolt an ir tyost
0,2596 vf der warte . der kost
0,2597 Einen grozen teil guldin die
0,2598 der soldan mit golde loste sie
0,2599 Sie lagen nv alle sicher me
0,2600 dan sie getan hetten e
0,2601 Sit sich der furste cvnrat
0,2602 in ir helfe getzogen hat
0,2603 Mit im der von monteral
0,2604 Reynolt d' menliche fral
0,2605 Lvdewig het eine gewonheit
0,2606 daz er gerne tzu gwiden reit
0,2607 Dem kunige tzu eren tet er daz
0,2608 vn- ouch also daz er die baz
0,2609 Gegen den vienden werlich
0,2610 mit den sinen hette sich
0,2611 Von im selben ein vzerwelt
0,2612 was gar ein menlicher helt
0,2613 Sines mvtes veste gwido
0,2614 weren ouch bi im gewesen so
0,2615 Die an sinem ringe lagen
0,2616 vn- harslichtens phlagen
0,2617 Er het die frantzoysere
0,2618 alle walhen burgvndere
0,2619 Vnd' in allen doch lif daz mere
0,2620 daz nicht bezzer ritter were
0,2621 Dan der lantgrave von duringen
0,2622 ouch der hertzoze von lutringen
0,2623 Iach im des mit al den sinen do
0,2624 ouch hetten in gar die dutshen so
0,2625 Noch so sagten sie da bi
0,2626 daz er ein gut geselle si
0,2627 Gewest mit den rittern wunneclich
0,2628 fro . milde trostlich
0,2629 Daz tzimet allen fursten wol
0,2630 diz bi ir wurde wesen sol

0,2631 Als mir tzu wizzene ist getan
0,2632 vn- die rede ich v'nvmen han
0,2633 Nicht von mir selben ich die sage
0,2634 vor vesptzit nach mittem tage
0,2635 Iz was da mit Cvnrate
0,2636 des worden tzu rate